

ISAÍAS

Jawen unanmati janchaki

Jerusalén anuxun Dios yuixunika Isaíasin jawenabu pewamanun ixun Diosun yunua jatu yusinkin taewakubainikiaki. Judán enabu xanen ibubu Jotam inun, Acaz inun, Ezequíasin jatu yunukubainaibutian jabiatiandi Isaíasin jawenabu jatu yusinkubaina jawa ninkabuma jakia eskadabestun jawen jancha ninkaxun jawen kene adunibukiaki. Jaska Jehován jatu pepa wakatsi ini na una medan jau bebunkidi unanunbun jatu yuikin jaskada Jehován jatu pewani nun tapintidubuki. Na jabias jancha ninkakubainankawanen. Na una kenekinan, ja año 740 Cristo judiamatian anikiaki.

Judán enabu chakabujaida jiwenibukiaki, na janchadan

1 ¹Jaska ikunkainxanai Amozin bake Isaías nama keskawen Diosun jawen jancha xabakabi bebunkidi unanmanikiaki, jawenabu Judákidi inun jatun maewan Jerusalénkidi jatun xanen ibujaidabu Ozías inun, Jotam inun, Ahaz inun, Ezequías Judá anu jabu xanen ibujaidakubainaibutianan.

² Nai inun maiin, matun Jehován matu yuiai ninkakanwen.

“Matun bakebu en jatu yumewabia jabu juni ewatan jakia jabun ea danain eki sinatakanikiki.

³ Awa bene ana pubenmawakin jawen jubu mexteabu ana pubenma jatun ibu unanti wamamisbuki.

Ja inun, asnon ja jiwe anu janu ibuan uxanmis unandiamiski.

Jakia Israel enabu wakin en jatu katubiani ea unanbuma inun ekidi daki shinan jayabumaki.”

⁴ Man junibu chakabujaidadan, ¡man peidakanwan!

Man yudabu atimapa chakabu bestiwen kemui man jiweadan, matun ibubun chakabuwakubainibuwen taea

man jawen bakebun jabias chakabu chibainbu inun, man jawen bababun jaska adiaibudan,

jaska wakin man ma Jehová jeneaki.

Israelin Dios mekenan medibi man jayabia putatan
man ma xununbainaki.

5 Matudan, ¿jaskai man danananain sinatai jenekatsi ikamamen?
jawen ea kopi shadawe, ikadan.

Matun yudadan, tsuan jani matu ana kushati jayamaki.

Matun buxka ma matu makush makush akabu man isin teneaii.
Jaskawen taea matun kushipa benui man ma babui keyuaki.

6 Matudan, matun buxka yuda jidabiyabis man jawa pe jayamaki.
Man dasibi dete kextuki,

matu kushakin matu pexa pexa akabudan.

Man jaskabiaken tsuan matu daunkin matu tsamianbumaki.

Man isin tenejaidai jawen man mainun
xeniwen tsuan matu dapuxabumadiki.

7 Matun mai pakea anu ana tsua janu jiwtima wakin ma
chakabuwakubainimabuki.

Matun maewan tibi chiwen ma matu kuainmabuki.

Man uinbiaya matun bedubi matuki sinatamisbun
matun miban man banaima jabun pikanikiki.

Sodoma maewan Diosun yamawani keska
matun mai pakea dasibi matunadi ma jayamaki.

8 Sión maewan anudan, jawa betsa bashikuamajaidaki.

Jabu jenebainimabudan, uva bai anu pean xubu besti jayaki.

Badan betsa melón bexea bai namakis anudi pean xubu besti jayaki.
Ja maewan kexebauna jiweabudan, matuki sinataibu besti jayaki.

9 Jehová Dios dasibi binuatun jawa nukunabu eskadabes nuku jatube
texewama inidan,

na jabiatianan, ja nawabu Sodoma inun Gomorra anu jiweabu
Diosun jatu yamawani keska nun ikeanaii.

Ana chintuntan Dios kayabi kenwantikiaki, na janchadan

10 Maewan Sodoma xanen ibu inibu keskabuun, Jehován jancha ninkakanwen.
Maewan Gomorra anua keskabuun, ninka pejaida wakanwen,
nukun Diosun matu yusiainan.

11 Jehová Diosun matu yuikin:

“¿Jaskakin jatida matun inabu ea inankin man ea menuxunmismen?
Matun chaxuwan bene inun ina awa bene babupan xeni man ea

menu keyuxunmisdan,

ma en jabu jatsanki.

Jaskawen taexun ina awan jimi inun, chaxuwan benen jimi inun,
cabra baken jimi

- chanima ana jabu uinkatsi ikama en dananjaidaii.
- ¹² Matubu ea bebun juxun man ea uinmaidan,
¿tsuan en jiwe anu matu bichia man ikai?
en jemaintinki meseama janu mapubaunkin
man ea ichakawaidan.
- ¹³ Matun inankuin en ana bechipaiamaki.
Ana jamen ea bexunyamakanwen.
Jabun kuin inabainaidan, en ana xetekin tenetidumajaidaki.
Matubu uxe bena taxniai tibitian inun,
juindukunti sábadotian matunabu ichawatan kein benimai man
besimiski.
Jakia man jiwe chakamiswen taea ja besi man imis
bechipaiama en dananjaidaii.
- ¹⁴ Uxe bena taxniaitian inun jaska ichatan man pi beyuskunkainaidean,
man jaskabiakubainaiwen taea en matuki chikishchakayamaii.
Man jaskakin ea bika tenemai ¡en ana jaska tenetidumajaidaki!
- ¹⁵ Matun meken meshantan ebe janchakin man ea yukabiaya
en matukidi uinkatsi ikamajaidaki.
Man ea yuka chakayamabiaya
man meken jimi jaswen taexun en matu jawa ninkamaki.
- ¹⁶ ¡Matun meken mepanui pedikanwen!
¡En uiain anua jawada chakabu man amis jenedikanwen!
¡Man chakabuwai janun bextekedikanwen!
- ¹⁷ ¡Pepa besti atikidi tapindikanwen!
¡Tsua ana padantima menan pepati jawaida benakanwen!
¡Jatu ichakawaibu jatu medabewakanwen!
¡Yunuti janchawen taexun bake ibuumá
jatu ichakawama jatu medabewa bestikubainkanwen!
¡Beneyabiani ana beneumabu
jawen jiweawen bika teneai medabewai janchaxunkubainkanwen!”
itan
- ¹⁸ Jehován ana matu yuiai ninkakanwen:
“Matube janchakin matun jiwea en matu pewakatsis ikai
nenu ea anu bekanwen.
Matun chakabu juni dama tenan jimi xana bidi ikai keskabiaken
matu chuka pewakin matun chakabu matu buaxunkin
juxupa keska en matu jenekatsis ikaii.
Man chakabumis atimapajaidabiaken
matu chuka pewakin matun chakabu matu buaxunkin
juxupa keska en matu jenekatsis ikaii.
- ¹⁹ Shinan betsatan man ea ninkakubainaibunan,

ja mai anua miban pepajaida beneai jaya man pikubainxanaii.

- ²⁰ Jakia shinan betsakatsi ikama jen iyamai danananain sinatai man
jeneamadan,
tsuan ana matu medabewama detenameaibu anua man
mawaxanaii”,
ikin ibubis Jehován matu yuixuki.

Jehová Jerusalénwen nuikin ana jatu pewaxunxanikiaki, na janchadan

- ²¹ Jaskatan maewan ninkanikabia
¿jaskai shinan chakai min ma ainbu jininipa keskamen?
Uatian dasibi minabu pe jiwxexun pe besti aki jiwekubainibuki.
Jakia eskatianan, man juni sinatapabu bestiki.
- ²² Min plata pei kadu keska ibiani
eskatian maei min chaka putamisbu keska bestiki.
Min uva vino pepa keska ibiani
ana jaskama chintuntan min unpax paisma keska bestiki.
- ²³ Jaska inun, matun xanen ibubudan, sinatapa yumetsubun
jaibuabuki.
Ana pei mais jatu pewaxunkatsi ikama
jatu padankin jatun peiwen besti jatu ichakawakubainkanikiki.
daketapai ea inankuinwen ika ea ikin bena bestikubainkanikiki.
Bake ibuumabu jatu pe medabewati shinanbiai jabun jatu uins
bestikanikiki.
Ja inun, ainbu beneyabiani beneumabukidi
jabun jatu medabewai pe janchaxunkatsi ikama jatuki pechiabuki.

- ²⁴ Jaskawen taexun Jehová kushipa dasibi binuatun
jawen kushipawen Israel medabewamis
jawen jancha kushipawen jatu yuikin:
“¡Jatixun besti matun chakabu en tenetiduki!
Man jabu eki sinataibudan, matun chakabu tanatan
matube detenameai keskakin en matu kupixanaii.

- ²⁵ Januxun ana matu kUPI benawakin
sinatakauan matun chakabu atimapa tibi dasibi ichawatan
chaka putamisbu keska pewakin en kua keyukatsis ikaii.
- ²⁶ Matun xanen ibu unanti wanikabu jabu dukun inibu keska
en ana matu katuxun yunuxanaii.
Matun juni unanepabu jabu dukun inibu keska
matu medabewakin ana en matu katuxun yunudiaxanaii.
Jaska tibi en ana matu waya chipu tsuabunda matu uintan yuikin:
‘Ja maewan Jerusalén anudan, ana tsua ichakanika jayamaki.
Ja maewan anuxun Dios besti chibankubainkanikiki’, ixankanikiki.

- ²⁷ En ichakanika jayama inun en mekenan pepatun
man Sión anu jiweabu matun chakabu en matu putama
ea anu man ana chintunxanaii.
- ²⁸ Jakia ichakanikai sinatamisbu inun chakabubu
jabu ea anu beabuma jatu kupikin en yamawaxanaii.
Jabun ea jenebaini mawaxankanikiki.
- ²⁹ Man jabun ja ji itamama naman inun jua bana bechipaikin
januxun yushibu betsap man kenwankubainmisbudan,
jabudan, man dakejaidaxanaii.
- ³⁰ Matudan, ja ji ewapa pei xanakaini jushinmis keska man ixanaii.
Ja inun, ja jua bana tsuan unpax tacha aisma keska man ixanaii.
- ³¹ Ja xanen ibu kushipai kenmisbudan,
ana jaskama betsai basi chushiai keska ikanikiki.
Jatun dayadan, chi pexe pexe iki jawaida nukamis keska ikanikiki.
Ja juni inun jawen daya jabia dabe janu dabel ketia ji ikai
tsuan jatu nukawatiduma ixankanikiki.”

Yudabu Diosun jatu unanuma jiwemaxanikiaki, na janchadan
(*Miq 4.1-3*)

2 ¹Na jaska ikunkainxanai Amozin bake Isaías nama keskawen Diosun
jawen jancha xabakabi bebunkidi Judákidi inun jatun maewan
Jerusalénkidi xabakabi unanmanikiaki.

- ² Janu badi jawen jenei ma kemaya
ja mati anu Dios kenwanti jiwe jayaken
Dios jakidi janchakin mestenwanxanikiki.
Ja mati binua anuxun jakidi pe shinankin mati tibi binua anu
nawa xukua betsap bexankanikiki.
- ³ Sión anu Jehován yusian taxni Jerusalén anu jawen jancha
kainxanaiwen taea yudabu midimajaida janu jikitushitan yuikin:
“Jehován Mati Sión anu nun mapekenun bekanwen,
Jacobun mekenika Dios Jehován kenwanti jiwe anudan.
Jadixun jawen pe jiweti shinankidi nuku yusianbu
ja bai keska jawen yusian chibankin
tapin nun pepaxankanaii”, ika
bebidan bebidanxankanikiki.
- ⁴ Januxun nawa xukua tibi Jehován unanti wakubainxanikiki,
ja yudabu ichapajaidabu jawawenda ja imisbu
jadatuda pepa inun jadatubunda kaneaibu unantan jatu pewakinan.
Jatu jaska wa janua jabu maei betsaidan,
jatun nupe kenu chaipabu betsap wakin
jawen mai tsispubidanti waxankanikiki.

Ja inun, jatun chachiti betsa wakin texki machatu waxankanikiki.
 Ja jaskaibutianan, ja yudabu ana jatun detenameti mabu betsawen
 ana tsuabe detenameama ixankanikiki.

Ja inun, detenametikidi ana tsuan jatu yusianma ixanikiki.

5 Jacobun enabuun, ¡Jehován yusian pepa xaba keska chibambaini
 jawen jiwei taedibainankanwen!

Uva bai miyuidan, Judán enabu keskakiaki, na janchadan

- 5** ¹En jaibu pepajaida en jakidi kantai ea ninkakanwen,
 jawen uva bai bechipaimiskidi en kantaxunaidan.
 En jaibudan, uva bai jayaki.
 Jawen bai anudan, mai pepajaida jayaki.
- ² Pukinbainkin mai pewakin mishki putakin pewatan
 jawen uva tacha pepa bitan banaimaki.
 Januxun jawen bai nemaki januxun uinbaunti jiwe pishta keyatapa
 waimaki.
 Ja inun, januxun tsinikin vino wanti pewaimaki.
 En jaibun jaska watan jawen uva banaima
 uva batapa manabiaya
 jakia jawen uva bexeax anu uva bimi pe ikama
 bimi bunkash besti jayashinaki.
- ³ Ja maewan Jerusalén anu man Judán enabu jiweabuun,
 natian en matu yukai ea yuikanwen:
 Ja uva bimi bunkashdan,
 jadatu tsua chakabumenkainan, en uva baimenkain, en
 eamenkainan.
- ⁴ Ja en uva bai anudan, ana jawa jusitibiaken
 ¿en jaska wama ikimamen?
 ¿En jawa jakimatan akama ikimamen?
 Uva batapa ikai en manabiaya
 ¿jaskai uva jaska ikama bunkash ishianmen?
- ⁵ Eskaki. Matu yuinun ea ninkakanwen,
 en uva bai jaska wakatsi jakidi en shinainan.
 En jawen jatu nemakin keneima daka pekati, jau
 chakabuwanunbunan.
 En mishki kenebaunima daka en bedanti, jau jaki pai pai
 inunbunan.
- ⁶ Jaska watan jaki pechikainkin en jenebainkin
 ana pewakin en ana jawa damexteama inun en ana basi
 mexatidumaki.
 En jaska wabaina janu ni xuxu benei inun

jau mae muxa benechakayamaxanunwen.

Ja inun, jau ana jamamaki ui iyamanun
nai kuin en nemaxanaii.

⁷ Na uva baikidi miyuidan,
Jehová dasibi kushipajaidatun jabu bechipaikin
uva bai banayama keskadan,
Israel jiweabu jatun mai pakea inun
Judán enabun mai pakeaki.

Januxun jawen yunuti inun jawen nematiki mesekin jau
chibankubainxanbun

Jehová Diosun jatu manabiaya
jabu anudan, sinatai inun detenameaibu besti jayaki.
Ja inun, jawen yunuti kushipa pepa katuaibu jatu manabia
jaska jiweama jatu nuitapawaibu
isin tenei biski ikaibu en ninka bestikubainaii.

**Jaska wakin jawen jancha yuixunika wakin Diosun
Isaías katutan yununiaki, na janchadan**

6 ¹Ja baditian Ozías xanen ibujaida mawaya Jehová Dios en uinmakidi
matu yuinun ninkakanwen. Jawen tsauti keyatapajaida anu tsaua
jawen Templo kexa tadi di akin keyubima tsaua en uinmaki. ²Jawen nai
tsuma betsabu serafine chi keska ja mamaki jayaki. Jabu tibidan, ⁶ 6 jawen
punyan peiyabuki. Jatun punyan peiya dabewen jatun besu bepuabuki.
Januxun pei dabewendi jatun yuda bemakis bepuabuki. Janua pei
dabewendi nuyabaunmisbuki. ³Jabu yuinamei janchabaunkin yuikin:

“Medibi pepa, pepajaida
Jehová kushipajaida nukun Xanen Ibjajaidaki.
Jatunan, mai jidabi dasibi jawen kushipawen achi keyuaki.”

⁴Janua jui kushipa kainkainkin Jehován kenwanti jiwe beputi taka
taka aki inun jibia jiwe uke medandi chi kuin keska mataya ⁵ean
shinankin: “Eadan, jen peidawa! ¡En ma mawai! Ibubis en beduwen en
Xanen Ibjajaida Jehová kushipajaida dasibi binua en uinxuki, en juni jawa
pepama en kexawen chakabu en yuimis inun ja juni chakabubube en
jatube jiweadan.”

⁶ Jaska uinkin en shinanbiaya jabiatiandi ja serafine chi ji ikai betsa
en nia anu nuyakidan jawen mane tsumatiwen chi tsistu chi tapu anua
tsumabidan ⁷jawen en kexa ea metsamatan yuikin:

“Uinwen. Na chi tsistuwen min kexa en mia metsamaxudan,

jawen min chakabu en mia jayama waxunxuki.
Min chakabumis en mia buaxunxuki.”

⁸Januxun en ninkaya Jehován jawen jui kainmakin ea yuikin:
“¿Tsuán nukun jancha nuku yuixuntidu tsua nichinpa?” ikaya

ean kemakin:

“Eadan, en nenuki.
¡Jabia menan ea nichindiwe!” en aka

⁹jatun ea yuikin:

“Kaxun yudabu eska ea jatu yuixuntanwen:
‘En jancha ninkabiai jabun jawa ninka pewama ixankanikiki.
Uin bestixankanikiki, jabun jawa tapianbumadan.’

¹⁰Jatu ninkamamakin jabun shinan jatu beputanwen.
Jatun pabinki inun jatun bedu bepukin jatu junebauntanwen.
Min jatu jaska wa
uinbiai inun ninkabiakin jawa ekidi tapianma ixankanikiki,
jau ea anu beaibu en jawa jatu xuxa wayamaxanunan”, ikaya

¹¹ean yukakin:

“Jehováan, jaskadan, ¿jatian kauan ixanimenkain?” akin en yuka

Jehován ea kemakin:

“Jaskaidan, na mae ewapabu ma yamawa
ana janu yuda jayama inun,
jatun jiwe medan tsua jiweama inun,
jatun bai tibi ana jawa miban jayamaken ixanikiki.

¹²Ja inun, ea Jehován ja yudabu en jatu chai putaken
jatun mae anu jawa jayama xakaken
jatian ipakexanikiki.

¹³Ja yudabu décima parte en jatu jeneima
jabudi en yamawayaya jaskaitian ipakexanikiki.
Eska keskaidan, ji keyatapa dedabu
jawen budu besti jenemiski.
Jakia jawen budu anua jawen tuxpi betsa datakukidanmis keskai
enabu anua jawen baba betsa
medibi chakabuma taxnikaunxanikiki”, akin Jehován ea waimaki.

Ja dukun Diosun jancha Isaásin Ahaz yuinikiaki, na janchadan

7 ¹Jotamnen bake Ahaz, Ozásin babadan, Judá anu jatun xanen
ibuaya jabiatiandi Siria nawa xanen ibujaida jawen kena Resín

jawen mae anu xanen ibuaya janua Israel xanen ibujaida Remalíasin
bake Pécah jatu xanen ibuxunaya ja dabe dasitan Jerusalén jatu
detetan mebinun ika ibiaibun jakia jaska waxun atidubuma inibukiaki.

² Jaskaibutian tsuanda xanen ibujaida Ahaz inun jawenabu anu
jatu banabimakin: “Siria nawabu Efraín enabube dasitan matuki
yubakakanikiaki”, jatu wa janua Ahaz inun jawenabun jaska ninkatan
datebauni juinti bene bene iki ji xukua niwen jatu bubi bubi amis
keskaibun

³ januxun Jehován Isaías yuikin: “Ja tadi januxun patsamisbun basi bai
anu ja baiwen katanwen. Kai paxku debu anu xantu wanibu anu ja dexun
anu min juni bake Sear-iasubbe jikikain xanen ibu Ahaz jadi uin ka jaki
nukutan ⁴ eska yuitanwen:

Siria xanen ibu Resín jawenabube inun Remalíasin bake
matuki sinatajaidai chi tsistu dekenbia
ma nukai keskabuki.

Jaskawen taea mesei jatuwen dateama
mimebi pe mekewe.

⁵ Siria nawa inun Efraínen enabu inun Remalíasin bake xanen ibujaida
jabun matu chakabuwanun ika yubakakanikiki.

Jabu janchai:

⁶ ‘Judá mai pakea anu jikibainan,
jatu datetan nun jatu maemadan, nukun xanen ibu wakinan,
Tabeelin juni bake ananxankanwen’, ibiaibun

⁷ jakia Jehován jabukidi yuikin:
‘Tsuán taska jaska watidumajaidaki!

⁸⁻⁹ Siria mai pakea maewan januxun xanen ibujaida jiwexun
yunumisdan, Damascoki.

Resínan, Damasco xanen ibujaidaki.

Jamen Efraín mai pakea maewan januxun xanen ibujaida jiwexun
yunumisdan, Samariaki.

Remalíasin juni bake xanen ibujaidai Samaria anu jiweaki.

Jaskabiakubainaibun 75 año keyudiamatian

Efraín maewan yamaxanikiki.

Jamen matudi man Dioskidi shinankin pe mestenwanmadan,
matudi jabiaskadiai mesteanma man keyuxanaii’, matu waikiki.

Atanwen.”

**Emanuel kainxanaikidi Isaásin ana Diosun
jancha Ahaz yuiniaki, na janchadan**

¹⁰ Ahaziin, Jehová Diosun mia ana yuikiki. Ninkawe: ¹¹ “Min Dios
Jehován jau jaska tsuan atiduma mia axunun jawen unanmati jawada

yukawe, na mai bemakia kasmal, mai uke medanjaida mai medanua kasmal, manaundijaida nai anuadán”, aka

¹² Ahazin Isaías ninkatan kemakin: “Ean en jaska watidumajaidaki, en xanen ibu Jehová unanti wakin jawen unanmati yukakinan”, ikaya

¹³ januxun Isaásin ana yuikin:

“David xanen ibujaidani anua jawen bababuun, ea ninkakanwen,
matu yuinanun:

En junin mia yunubia danankin min ea bika tenemaii.

Jakia en Dios ana dananjaidakin en Dios man bika tenemadiaii.

¹⁴ Min jaska shinanbiaya Jehová kayabitun
jawen unanmati jatun matu uinmaxanikiki.

Chipash tsuan chutadiama anua juni bake nanetan kainxanikiki.
Ibuan jawen kena kenakinan, Emanuel waxanikiki.

¹⁵ Ja juni bake kainmaxunan,
bakeishtatun awa chuchu tanki inun buna bata pikubainxanikiki.

¹⁶ Jawa chakabu inun jawa pepa unandiamma jaskaitian ja mai pakea
anuxun

xanen ibujaida dabettun mia dateaibudan,
jatun mai pakea jenebainabu ana tsua jayama ixanikiki.

¹⁷ Jehován mia anu chakabujaida jatianda yunuxanikiki,
min mae anu jiweabu inun minabu min jiwe jawendua anu jiweabu
anu kainmakinan.

Efraín inun Judá man paxkanitian jaska man jiweisma chakabujaida
matu anu taxniai man uinxanaii.

Na jaska chanidan, Asiria xanen ibujaidatun jatu axanaikidi
yuinikiaki.

¹⁸ Egipto jenewan kexa ukedi chai jiwebaunabu
Jehován jatu yunua jadia ja yudabu ja baditian chupe
beasxankanikiki.

Asiria anu jiweabudi xada beasdixankanikiki.

¹⁹ Jabu ichatan jawaidabidan janu junei mawa xankin tibi junei inun,
tanpe tibi anu junedai inun, ni muxaya tibi anudi junei inun,
chacha tsaua ina awan amis anu janu junexankanikiki.

²⁰ Ja jaskaibutian Asiria xanen ibujaida Jene Éufrates ukedi
chajaidakea

Jehován jatu yunuyutan medabewakin

Jehován nupe kenu kexni ati keskakidan

Asiria xanen ibujaidatun Israelin enabun bu inun, jatun kexni inun,
jatun bikedan dani jatu beden akin jatu ichakawaxanikiki.”

²¹ Ja jatu jaska waibutian tsuada jatun mai pakea yamawaibutian jabu paxaimaxun jatun mae anuxun jatun ina awa bake yuxan inun chaxuwan bake yuxan dabe yumewatan ²²jatun chuchu paipaima tsinikin jamen atan chuchu tanki pikin buna bata akubainxankananikiki.

²³ Ja jatu jaska waibutiandi ja dukun uva bai 1,000 taxku banabu jawen kadu 1,000 plata pei jexe ibiamis maei muxa besti benexanikiki.

²⁴ Mai pakea jidabi anu jadi kaidan, ja muxa beneyamawen taea piaya kaxun yuinaka tsakati besti ixanikiki. ²⁵Mati anu dayakin mai bedex atiwen udubiapaunibu maei muxa midima beneyamaken ana jadi ka tsua dayatidumaken inabu awa inun chaxuwanen piti besti basi benexanikiki.

**Jawenabu jawen jatu unantidubukidi Isaásin
jawen bake kenanikiaki, na janchadan**

8 ¹Jehován ea yuikin: “Ji bexa tude sapa bitan jaki min jancha kuinwen eska kenewe: ‘Maher-salal-hasbaz’, wakinan. ²Jaska min wai jabun uintan chanitidubu juni dabe chanichakaisma Diosbe jawenabu janchaxunika Urías inun betsa Jeberequíasin juni bake Zacarías jau unanun jatu bebunxun kenewe”, ea wa

³chipu en ain Diosun jancha yuixunikabe en jabe chutanameima ja tuyatan juni bake kainiki. Januxun Jehován ea yuikin: “Min bake kenakinan, ‘Maher-salal-hasbaz’, waxanwen, nukun janchawen yuiadan, ‘Jawaidakidan achixun yamawaki’, akinan. ⁴Min bake kainma jawa jancha pesei kenannamei: ‘Papaii’, iki ‘Mamaii’, idiamaken Damasco inun Samaria anu jiweabu Asiria nawabun jatu achixun yamawatan jatun mabu jawendua jatun xanen ibun jiwe ewapa anu buxankananikiki”, ea watan ⁵Diosun ana ea yuikin:

⁶ “Asiria xanen ibu Resín inun Remalíasin baken jatu datekin achikatsis ikaibuwen taea Judán enabu jatuki dateaibun Siloé jene pes daka unanxubida jabamis Judán enabun ichakawakanikiki.

⁷ Jaskawen taexun Jene Éufrates Jehován mata wakin jatu achimaxanikiki.

Jaska yuiadan, Asiria xanen ibun jawen kushipawen jatu achi keyuxanikiki.

Jawen paxku texexa tibiwen jene jikibainkin dasibi kenku mataismabia achikin keyukin

⁸ Judán mai pakea jadi binubain jadi kesuismabia kenku tsakaxanikiki.

Isa jawen pei pesha dakamis keskakin, Emanueliin, mai jidabi min achi keyuxanaii.

⁹ Nawa xukua tibibuun, matunabube ichatan jatu detexankanwen.

Mai pakea chai tibi anu jiweabuun, man eskaxanai ninkakanwen.
 Detenamenun ixun matun pia man bibiabauna
 chanima man datejaidaxanaii.

- ¹⁰ Man nukukidi yubakabia man akama ixanaii.
 Jaska bechipaikin man katuxun yuibia man nuku akama idiaxanaii,
 Dios nukube nashui itan nuku mekeawen taeadan.”

Jehováki besti mesei jaki datetikiaki, na janchadan

¹¹ Jehován ea tsuma mestenwantan ja juni chakabubun shinan en jatu chibanyamanun bebunkidi ea unanmakin nemakin ea yuikin: ¹² “Jabu matukidi yubakaibun jatubebis yubakayamakanwen. Jabun matu datekin mesewabiaibun jatuwen dateyamakanwen. ¹³ Jehová Diosun dasibi binua medibi pepa jatun nema keyutidu bestiki datekanwen. Ja bebunua besti man jaki datetiduki. ¹⁴ Eadan, matuwen taea en eskaki. En matun ichati jiwe medibi keskaki. Jakia Israelin bakebun xanen ibu dabe en mishki daka jaki juti itidubu keskaki. Eki juti ika keskatan ea danain ja xanen ibu dabe jatunabube di ixankanikiki. Jerusalén medan jiweabudan, en bidun keska anu jikitan jabudi jadakidi kaintima nuitapaxankanikiki. ¹⁵ Ichapajaida eki juti ixankanikiki. Eki juti itan di iki mawaxankanikiki. Jabudan, bidun medan jikiaibu jatu bepuabu jadakidi kaintidubuma ixankanikiki”, itan,

**Jawen tsumabu bebunkidi jaskaxanaibu Isaías
 jatuki chaninikiaki, na janchadan**

- ¹⁶ ana Jehován ea yuikin:
 “Na en janchadan, adukin pewawe.
 Jaska en mia yusinkin unanmaxudan,
 mestenwantan miki chiti ikabu jatu yusinkubainwen”, ea waya
- ¹⁷ Jehován jawen jancha Jacobun enabukidi junebiaya
 eanan, ikunwain en jaki chiti ikaii.
- ¹⁸ Jehován jawen bake betsabu ea anu inankin yunua jabubetan
 Israelin enabu Jehován jaska bechipaiai
 jawen kushipa unanmakin xabakabi wati nun ikunkainaii.
 Mati keyatapa Sión anu jiウェン
 Jehová dasibi kushipa binuatun nuku yunua
 nun akai nun jawena nuku uinxankanikiki.
- ¹⁹ Jakia juni betsabun matu yuikin:
 “Mawabun yushinbe janchamisbu yukakanwen.
 Ja juni mukayabu jatun yushinbe janchai xei ikawen
 tsuan ninkatidumawen janchamisbuki.
 Yudabu jatun yushibube janchakinan,
 ぐmawabun unanepa jancha yukatimamen, jiweabunan,

20 jaskaxanaibu tapinkinan?

Jaska jakidi janchakin yukabiamisbudan,
jabun yuiadian, ipatapa unainsmapabuki!

21 Ja juni shinan pewama buni paepai

buni bestiwen nui sinatai mapubaunxankanikiki.

Jaskakin jatun xanen ibujaida inun jatun yushibu yupui
jatuki jancha chakabuxankanikiki.

Manaundi nai teskanxun uintan

22 januxun chipu main tinintan

jawa pepaki nukuama n uitapajaidai inun

meshu medan bika besti tenei

dasibi meshun besti achia uinxankanikiki.

Jabun jatu achia jadakidi shinanbaini paxatidubuma ixankanikiki."

**Dios xanen ibujaidatun bake jawen unanuma
jiweti kainxanikiaki, na janchadan**

9

1 Galilea mai pakea anu Zabulón maewan inun Neftalín maewan
anu ja dapi nawabun Dios ikunwanbuma jiweabu, Jene Jordán
kexa ukedi inun Ianenwan Mediterráneo kexa betsaudi nawabu jiweabu
Diosun ja dukun jatu ichakawabiapaunixun ana betsatian Dios jabuwen
nuikin jatu duajaidawaxanikiki.

2 Ja yudabu meshu medan punu nuka mapua keskabu

en jatu medabewaya bin ewapa chaxa taxnia

ea jawa unanbuma ja nawabu meshu medan jiwea keskabun ja bin
uinxankanikiki.

3 Jehováan, jawen benimati ewapa min ma yunuaki,
nun jawen benimajaidaidan.

Nukun yunu tseka keyutan nun benimamisbu keskai,
dasibi mia bebunga benimachakayamaxankanikiki.

Tsuabunda jawada mabu jawendua pepa jatu paxkaxunabu bi
benimai keskai

mia bebunga benimaxankanikiki.

4 Tsuanda jatu tsuma waxun jatu bika tenemaibu inun,

bika betsaa betsapaa jabun meaibu inun,

xanen ibubun jatu ichakawamisbudan,

jabudan, min jatu nemakin putamaxanaii,

ja Madián nawabu min jatu yamawani keska wakinan.

5 Soldadobu detenamei jatun bichi tae keyatapa sawea
badux badux ibainmisbu inun,

jatun tadi jimi jas mapumisbu jabudan,

chiwen min jatu yamawakin kuaxanaii.

⁶ Jamen betsadan,

Diosun jawen kushipawen dasibi betsa wakin
bakeishta nuku inanxanikiki.

Ja bake nuku anu yunua kainxanikiki.

Jatun kushipa bitan xanen ibujaidaxanikiki.

Jawen kena tibi inankinan, eska waxanikiki:

Jawen yubakani nun jaskaxanai unanmanika pejaidaki.

Dios kushipajaida tsuan binutidumaki.

Epa jiweibi jiweaki.

Jawen taea Diosbe unanuma jiwetiki.

⁷ Ja yumeten tsauidan,

David xanen ibuni anu tsauxanikiki.

Xanen ibujaidakin jawen kushipawen
mai jidabi anu xanen ibukin tsuma keyubaunxanikiki.

Jawen unanuma jiweaibu keyuama inun

jawen yunuti kushipa keyuama ipakexanikiki.

Ja xanen ibujaidaidan, mesten tsuan maewakin
tsekatiduma jabias ipakexanikiki.

Dios kushipajaida dasibi binua jawen nui pae
tsuan nuka watidumatun nuku jaska waxunxanikiki.

**Jesén baba betsa jawen yunuti kushipa pepawen xanen
ibujaidakin jatu unanuma jiwemaxanikiaki, na janchadan**

11

¹ Jesén enabu Asiria nawabun jatu ichakawakinan,
ji dedakin jatu jawen budu keska besti wanibuki.

Jakia ja ji budu anua ana takuxanikiki.

Jawen tacha anua jawen tapun betsa jukunmis keskai
juni betsa ana kainxanikiki.

² Diosun Yushin kushipa jabe ketaxametan putama eska
wamakubainxanikiki.

Ja juni Diosun Yushinin medabewa jadatu bai pepa inun
jadatu bai chakabu unanmatidu wakin inun,
jawen unanepati inankin inun,
jawen shinan bebunkidi pewanika inankin inun,
kushipa inankin inun,
Jehová Dioski mesetidubu unanmanika ixanikiki.

³ Jatun jatu unanti wakinan,

bemakis jawen beduwen besti uintan jatu unanti wama inun,
jaska betsabun yui kakaibu ninka bestitan
jatu unanti watiduma ixanikiki.

- ⁴ Jakia nuitkaapai babubu jatu medabewakinan,
 yunuti pepa kushipawen jatu unanti wakin
 jaska betsabun jatu ichakawaibu jatu nemaxunkin
 ja nuitkapaibu jatun mai pakea anua jatu pewaxunxanikiki.
 Jawen jancha mestenti kushipa keskawen
 mai anuxun jabun jatu detenamemaibu jatu kupixanikiki.
 Jawen jancha kushipawen juni chakabubu jatu tenanxanikiki.
- ⁵ Tadi saweaki jawen nanexeketi sawekin mestenwan keska wakin
 yunuti kushipa pepa inun jancha chanima sawekin akawaxanikiki.
- ⁶ Janua Jesén baba ma pe xanen ibuaya
 kaman inu chaxuwan bakebe dasitan menamei unanuma
 jiwxankanikiki.
- Ja inun, inu keneya daka anu cabra bake jabe beua
 juindukunxanikiki.
- Ja inun, ina awa bake león inu dapikea yumexanikiki.
 Ja inun, dasibi yuinaka mese puben inun pubenma
 bakeishtan jatu mekekin nimakubainxanikiki.
- ⁷ Ina awa inun oso ana sinatai pubeanma ibunamexankanikiki.
 Jatun bake jatu dapi mapua juindukunxankanikiki.
 León inawanana, basi besti pixanikiki,
 ina awan pimis keska wakinan.
- ⁸ Bakeishtan chchu jenediamu dunu paepajaida cobran kini dapikea
 beyusxanikiki,
 ana menameamawen taeandan.
- Jawa dateama bakeishtan dama chchu jeneatun cobra daka kini
 medan jawen meken mistuxanikiki.
- ⁹ Ianenwan matajaidamis keskai
 mai pakea jidabi anu dasibibu en unanepa jayatan
 ea en Jehová Dios unanxanaibuwen taea
 en mati medibi anua
 ana jawa sinatai ichakanikama ixankanikiki.
- ¹⁰ Ja jaskaibutian ja Jesén tacha ja jawen tapun betsa
 benetan yudabu xukua tibibu jatun Dios jatu unanmati ikanikiki.
 Jabun jatun xanen ibu benakinan,
 jawen mae pejaida chaxakapaki nukunun ixun
 benabaunxankanikiki.

**Samaria mai pakea jaskaxanai bebunkidi
 jatuki chaniniaki, na janchadan**

28

¹ Samaria anu jiweabuun, ¡man peidawa!
 Efraín maewan Samaria jawen maiti jawendua keska wakin

jawen kenmisbudan, jadan, jabu paenmisbun maeki.

Jua jawendua keska ibaima ana jawenduama utsitan chapuai keska bestiki.

Mati mapanpa anuxun jatun yunu bai tenanman mai pepa uinmisbu janu jiweabu vinowen kemui jaki nexenibun akin jeneisbumaki.

² Jehová Diosun juni kushipa ma jatuki tanaxun pewani chipu Samaria anu yunuxanikiki.

Jawen kushipadan, badux ui mesejaida nidi ikai keskaki.

Niwe kushipajaida bekin dasibi chakabuwamis keskaki.

Ui tueketan jeneisma keskaki.

Jene bai mata chakayamakin dasibi achibainmis keskaki.

Jawen mekenen mai chakabuwakin bedankin

³ Efraín mae jawen maiti jawendua keska anua paein jawen kenmisbudan,

jawen taewen pema pema akin yamawaxanikiki.

⁴ Ja jua jawenduabaima ma utsiya manananxun tenanman uinkin mai pepa anua yunu banaimabu keskabia jawaida keyuxankanikiki, ja higo bimi janu ikaitian ja dukun jushian uinkin tsekaxun pimisbu keskaidan.

⁵ Ja jaskaitianan, Dios dasibi binua xanen ibui maiti pepa chaxakapa jawendua sawea keska iyanikiki.

Ja jawen mae texenibudan, jabudan,

Diosun kushipawen jawenduai pepajaidaxankanikiki.

⁶ Jabun unanti wanikabu tsauxun
jatu unanti waibu Diosun jatu medabewakinan,
jawen yunuti kushipa pepa jatu inanxanikiki.
Jatuki sinatai beaibu jau nemanunbun
detenamenikabun jabun mae mekeabu
jatu kushipa waxanikiki.

Bebunkidi Jerusalénkidi Dios yubakani xabakabi wakatsi jatu yuinikiaki, na janchadan

⁷ Betsabu ikidan, vinowen paean
ni peama kexka kexka iki
janua shia paepa aki
jawendi paenjaidai bedame bedame iki di imisbuki.
Jabu jawenabu Diosbe janchaxunikabu inun
Diosun jancha yuixunikabun ja shia paepa akawen taea
ni peama kexka kexka iki inun
vino aki paeawen taea shinan pe watidubumaki.
Nama keskakin jabun Diosun yusian uinkin ninkabiatan

- pe shinantidubumaki.
 Paentan jatu unanti wakin jadatu pe inun
 jadatu chakabumen, ixun jatu unantidubumaki.
- ⁸ Tapu tibikia paentan jaki jananbu janan matai keyuawen taea
 jani xunpin betsa pisi mayama jayamaki.
- ⁹ Patapakidan jabu eanu bea janchakin yuikin:
 “Nedi taxnikidan nuku yusinwen.
 Jaska Diosun mia uinmai nuku yusinwen.
 Nukubudan, nun bakeishta keskamenkainan,
- ¹⁰ dama jancha pesakin yuiai keskabudan:
 ‘ba, be, bi, bo, bu’”, nun ikaii,
 jancha unanumas yuidan.
- ¹¹ Jakia jaskabiai ja Samaria anuabun
 en yusian pe ninkabumaken
 nawabun jancha ninkatidubumawen jabu Diosun achixanikiki,
 jaska jancha ninkabumawen jatu bika tenemakin
 Diosun jatu jancha watiduma keska wakinan.
- ¹² Bebunkidi Jehován jatu yuikin:
 “Nenu nishma daka anua man juindukuntiduki.
 Nenu man punu nukabu janu bashikutan
 man juindukuin dakatidu jayaki.”
 En jatu wabia jabun ea ninkabumaki.
- ¹³ Jaskawen taexun Jehová Diosun jatu jancha wakin
 bakeishta tanainbu jatu ana yusinxanikiki,
 jabun dama tapinkin uiainbu keskadan.
 Jaskawen taea jabudan, ni peama pechiudi mananska tin ika
 keskabu ixankanikiki.
 Betsabu deteaibun, betsabu bidun medan jikitan
 jani paxatiduma keskabu ixankanikiki.
- ¹⁴ Xanen ibukin jancha atimapawen yuikin
 man Jerusalén mae yunumisbuun,
 Jehová Diosun jancha ninkakanwen.
- ¹⁵ Matun yuikin:
 “Jau isin chakabu jua nukuki nukuyamaxanun ika
 ja mawa mekenikabe nun ma yubakaimaki.
 Mawa bumisbu anu nun ma jabe yubakaimaki.
 Nun jawen idui meketidu man benaidan,
 chani besti nun benaii.
 Junenun ika chaniwen besti nun padananankunkainaii”, ikaibun
- ¹⁶ jaskaibuwen taexun Jehován jatu yuikin:
 “Mishki kadujaida en katuni

ja mishki uinbain jakimatima jaki tsamabaunkin mestenwanti
Sión anu en taxnimaxanaii.

Tsuanda ja mishki bechipaikin katutan jawen datetidubumaki,
ma jaki chiti ikadan.

- ¹⁷ Ja jiwe benikinan, jawen tanati mane xankama dispi deduntanxun
tana pewamisbu keska jawen yunuti kushipa kanetiduma ixanikiki.
Jawen tapa yushtuma keska wakin
jawen jancha kanetidumawen en axanaii”, jatu wanikiaki.

Chanichakakin ja june iduti man benamisdan,
badux ui ikin yamawaxanikiki.

Jene bai matabidankin janu man junemisbu matu
betsekanbainxanikiki.

Egipto medabe yukabiai jamenxankaniaki, na janchadan

- 30** ¹Diosun jawen jancha mestenwankin yuikin:
“En yusian ninkaisbuman bakebuun, ¡man peidaxankanwan!
Ebe janchai yubakamabia man ibubis yubakaii.
Jaska ean daya shinankin en matu yunuamabia
ibubis matumebi daya tibi akatsis ikin man katumisbuki.
Jaska shinankin man ichawamisdan,
chakabu ichapa manchian keska wakin man ewawaiii.
² Bebunkidi ebe janchakin ea yukama jawa shinanna
jawaida Egipto anuabu medabe benai jadi iduti keska
xanen ibujaida Faraón anu man benamiski,
Egipto anu jadi idui utati keska anu janu idunun ikadan.
³ Faraónen kushipa iduti man benabiai ka
iduti jayamaken jawen taea man dake bestixankanaii.
Jawen janu idui utati man benabiai ka
matu axuanmawen taea man babukidanxanaii.
⁴ Egipto maewan dabe Soan inun Hanés anu
jadi matun xanen ibu janchaxunikabu man yunubia
⁵ ja nawabun jawa matu medabewama
jamen matun xanen ibubu bushianbu dakebidanxankaniaki.
Jawa medabe inun benima matu bexuanma
chakabu inun dake pae matu bexunxankaniaki.”

⁶ Egipto nawabun jau jatu medabewai benunbun,
tsuabunda jatu benai buidan, eskaxankaniaki.
Jatun burro inun jatun camello kamaki
jatun mabu inun jatun inankuin pepa peumatan

- ja mai pakea Egipto mae anu jamen buxunxankanikiki,
 eska anu kapukebainkinan,
 janu tsua jiweama Négueb anu
 yuinaka mese puben ichapa jiweabu anu
 inu betsa león ji ji ikai inun, dunu paepa piananbu inun,
 yuinaka xeanan nuyabaunaibu anu nashui ikainkinan.
- ⁷ Egipto ana kushipa jayama inun
 jawa jatu medabewatidumawen taexun
 jawen kena betsa dabikin:
 “Yuinaka mese atimapa jawauma ji ji ikai keskaki”, akinan.
- ⁸ Isaíasiin, uinwen. Na jabiatian ji bexa sapa bixun jaki kenediwe.
 Eska netankin kenebainkinan,
 ja kene chanipaketi jawa tuxkutima inunbadiai wawe.
- ⁹ Ja yuda jiweabu yusin ninkaisma sinatapabu inun
 Diosun yusian chiban pewaisma unainsmapabuki,
 jabun Diosun yusian jawa ninkakatsi isbumadan.
- ¹⁰ Ja jabun jaskaxanai bebunkidi unanmisbu jabiabundi jatu yuikin:
 “Nama keskakin ana uinyamakanwen”, ikin
 januxun Diosun jancha yuixunikabudi yuikin:
 “Jaska chanima man uiain ixanai nukuki chaniyamakanwen.
 Jawada nun ikai jawen nuku dake wama nuku jancha pe besti
 wakanwen.
 Nun kanebiaya jaskaida nuku nemayamakanwen.
- ¹¹ Nenu ana mapuama nuku dapaxkadikanwen,
 Diosun bai kayabi mextebainidan.
 Israelin enabun Dios medibi be bun ana nuku nichinyamakanwen”,
 ikaibun
- ¹² Jaskaibuwen taexun Israelin enabun Dios medibitun jatu yuikin:
 “Bebunkidi jaska en matu yuibia man ja danaiin.
 Detenamei itimaskai inun chakabuwabauni
 jaki besti chiti ikin jatun matu medabewatidu keska man ja benaii.
- ¹³ Jaskawen taea ja chakabu tibi man akaidan,
 jawen kupiti man biaidan, matunaki.
 Mae mishkiwen kenebaunibu keyatapabia
 chakabui taei tuax ikunkaini jakidi man shinanmaken
 pikutan jawaida di iki bedanmetidu keska man jaska keskaki.
- ¹⁴ Mai shumuwan chakabui pusi tudeke tudeke ichakayama
 jawa jawen tude betsa bitan chi deken jawen beatidubuma inun
 tude betsawen unpax kini anua man unpax bitidubuma keska
 man jaska keskai yamaxanaii.”
- ¹⁵ Ja Israelin enabun Dios medibitun jatu yuikin:

“Eanu chintuntan unanuma man bashikuaidan,
man piskuxanaii.

Ja unanuma man jawen jiwei jawa dateama man jaki chiti ikaidan,
janu man jawen kushipaii”, en matu wabia
jakia matubu man jaskakatsi ikamaki.

¹⁶ Jaska shinanma janchakin yuikin:

“Nenua en jaskakatsi ikamaki.

Caballoki katsaumetan en paxai kaii”, man ikaya
peki. Chania jaskai man paxatidubuki.

Ana matun yuikin:

“Caballon tadanbaintiki tsautan nun kushimabainxanaii”, man ikaya
peki. Chania man kushikaini paxayadan, jabudi kushibainkin
matu chibankankanikiki.

¹⁷ Juni bestichai matuki tanakidan matu mese wabidana

1,000 yudabu jawen datei man paxaxanaii.

5 junibu matuki tanadiakidan matu mese wabidanabu
jatuwen datei dasibibu man paxadiaxanaii.

Matu jaska wabu eskadabesjaida man texexankanaii,
mati keyatapa binu keyua mamaki ji bestichai nia keskai inun
jawen unanmati mati pishta anu tadi bandera puntea niwen pea pea
amis keskaidan.

¹⁸ Man jaskabiaxanaya Jehová Diosun matu manaikiki,
jawen nui pae matu uinmakatsidan.

Jaska matuwen nuichakayamai matu uinmakatsi ikikiki,
ja Dios yunuti kushipa kanetiduma jayawen taeandan.
Jehová dasibi tsuabunda man manakaibuwen taea
jawen benimakanikiki.

**Dios yukama Egipto anua medabe yuka ikaibu
Diosun bechipaiama inikiaki, na janchadan**

31 ¹ Tsuabunda man Egipto anu medabe yukai man buaibudan,
iman peidaxankanwan!

Caballo ichapa man jayatidu inun,
jaki tadanbainti ichapa man jayatidu inun,
caballoki katsaumebainmisbu midima man jayawen taea
ana tsuki dateama jaki chiti itan
shinankin man ikunwantidubia jadan, jamenki,
Israelin Dios medibi anu chintunkin

man shinan betsa wai uinmakin benakatsi ikamadan.

² Jakia ja Diosdan, unanepajaidaki.

Jamapai tibi atiduki.

Chakabu watidu unainkiki.

Jawada yuitan maewakin ana shinan betsa waismaki.

Juni chakabubu jatuki sinatakin jatu kupixanikiki.

Jabun chakabuwaibu tsuanda jatu medabewamisbu jatuki
sinatadiamiski.

³ Egipto nawabudan, junibu bestiki, diosmadan.

Jatun caballodan, nami inun xau besti jayaki, yushinmadan.

Diosun jawen kushipa yunukin jatu kupiaitian ikidan,
eskaxankanikiki.

Egipto nawabun jawen kushipawen mekenikabu inun

Israelin enabu jatuki iduaibu

ja dabe mawai dasibi janus di ixankanikiki, benui keyuidan.

⁴ Jehová Diosun ea yuikin:

“Ea Jehová kushipajaida dasibi binu keyua

Mati Sión anua enabu Israelbu

jatu medabewai jui en eskakidanxanaii.

Inu betsa león inawan chaxuwan bitan piaya

chaxuwan mekenikabun león datekin kushimanun itan

janus ichatan sai sai abiabu león jawa dateama imis keskai
eadi jaska keskadiai en juxanaii.

⁵ Isapan jawen bake mekea ja mamaki nuyakaunmiski.

Jaska keskadiai Jehová Dios dasibi binua Jerusalén mekei en
jaskaxanaii.

Eadan, en jawen mekenanki.

En jawen piskumanikaki.

En jawen mepamanikaki.

Nuitapaibu en jatun paxawanikaki”, ea wakubainikiki.

⁶ Israelin enabuun, man jabun Dios bedabinwankin man danan
paepawabiaidan,

shinan betsatan Dios anu bedikanwen.

⁷ Oro mane inun plata mane matun mekenen dami watan kenwain
man chakabumisdan,

jawatianda matu dasibibun matun dami danankin man putaya

⁸ man jaska waitian Asiria nawabu machatu chaipawen
debuxankanikiki.

Jabu jaskaidan, junibun kushipawen ikama ixanikiki.

Detenameaibutian ja nawabu jatunabu paxaxankanikiki.

Detenamenika betsabun ja bedunan betsabu detenamenikabu
jatu tsuma wakin esclavo waxankanikiki.

⁹ Jatu jaska waibun jatun xanen ibujaida date paepai kainkaini kushikainxanikiki.
 Jawen detenamenika xanen ibu bexmasbun jatun unanti tadi bandera pusteya
 pekama jaki pechitan kushidiabainxankanikiki.
 Jerusalén anuxun chiwen jatu kupikin kuati Dios jayaki,
 janu jaki sinataibu januxun jatu kupiditan.
 Jaska janchakin Jehován mestenwainmaki.

**Xanen ibujaida benan yunuti kushipa pepawen
 jatu mekexanikiaki, na janchadan**

32

- ¹ Uatian xanen ibujaida sera xanen ibuidan,
 yunua pepawen yunuxanikiki.
 Jawen xanen ibu bexmasbu xanen ibuxunkinan,
 yunuti kushipa pepawendi ixankanikiki.
- ² Jabu tibidan, eskabu ixankanikiki.
 Niwe beaya janu idutidubu keska inun,
 ui niweya beaya janu paxatidubu keska inun,
 mai tsusin anu mibankin bai tibi waimabu anu
 janu jene jabai keska inun,
 janu jawa jayama anu badin kuajaidai anu
 mishkipanwan dakaxun mai utawamis kesabu ixankanikiki.
- ³ Jabun bedudan, pejaida jatu uinun ika bedu jan ikabu inun
 ninka pewanun ika pawexpai keyutan jatu ninkakatsis ixankanikiki.
- ⁴ Jatun akadan, shinantans akin kaneama
 jakia bebunkidi shinan pewatan akubainxankanikiki.
 Jabun jamapai jatu yuikinan,
 xabakabijaida jatu unanmaxankanikiki.
- ⁵ Ja xanen ibubu xanen ibuaibun yudabu atimapai daya peisma
 jatu kenwanbiamisbu ana jatukidi pe janchama ixankanikiki.
 Jamen uinbain kemutapa tsaubiamisken ana yudabun duawakin:
 “Min nukun xanen ibu kushipaki”, akin ana yuiama ixankanikiki.
- ⁶ Yudabu atimapai daya peisma jawen beyawen taea
 jaska janchamis jeneama inun,
 jaska chakabu shinain keska yubakatan jeneama akubainmisbuki.
 Chakabu besti kainmatan jiwenun ika jamapai atimapati
 benakubaini
 Jehová Dioskidi jancha chakabu yui chanichakamisbuki.
 Jabunan, bunibidanaibu jawa jatu inanma inun
 unpax manubidanaibu jatu amakin pewatan jatu nichinsbumaki,
 jatu nuitapawakinan.
- ⁷ Ja yudabu atimapai daya peisbuma machupakin

jatu padan bestikin jawadawen kemuti watan jatu jawen
achimisbuki.

Nuitapaibu jatu padan paepa watan ana jatu chakabuwamisbuki.
Jawa jayabuma: "Yunuti kushipawen ea medabewakin axunwen",
ibiaibun

jatu padan bestimisbuki.

- ⁸ Jamen ja juni shinan pepa duapabudan,
jabu janchai yubakatan pe besti waxankanikiki.
Jaska yubakashina jawa betsa wama mestenwantan
apakexankanikiki.

Ainbuaibu nuimakidi yusiankiaki, na janchadan

- ⁹ Matu man ainbuaibu nuibumaan,
matu yuinun ea ninkakanwen.
Iubis man kenmis ainbuaibuun,
en jancha ninkakanwen.
- ¹⁰ Natian man ainbu dayakapa matuki chiti ikubainmisbudan,
año bestichai kai binuaya
ana miban tibi jawaida jushianma inun uva bimi man tsekatiduma
jawan taea dakei man datexankanaii.
- ¹¹ Man ainbuaibu nuima jiweabuun, datei saki saki ikanwen.
Matuki chiti ixun man ainbuaibu matu kenwanmisbuun,
ana jaska shinanma date paepakin
matun bachi jawendua pekatan
jawan nui bika tenei unanmati bachi bexa sawedikanwen.
- ¹² Ja miban bai pepa anua inun uva bai kemutapa anua
matun piti keyuxanaiwen taexun
jaska man jatuwen nuiawaiwen taea
xutidin xutidin ikin jatu uinmakanwen.
- ¹³ En mai pakea anua ji muxaya inun nishi muxaya benexanikiki,
ja mae anua matun jiwe tibi anua jaibunantan nawai
man beyusmisbu anudan.
- ¹⁴ Ja inun, xanen ibujaidatun jiwe jawendua jenexankanikiki.
Ja maewan medan yudan kaian jiwebiamisbu janu ana tsua jiweama
ixanikiki.
Jatun iduti mishkiwen kenebaunkin kushipa wanibu jenekibi
jenexankanikiki.
Jaska wabainibu anu asno unanjaida jadi benimai jiwea anu
jabianudi ina awan basi pixankanikiki.
- ¹⁵ Jehová Dios dasibi damiwanikatun jawen kushipa ana nuku anu
yunua juaya

janu jawa miban jayamabiaken betsa maewakin
mai anu dayati pepa wakin
janu miban pepa benemis anu
ana bimijaidati jayaxanikiki.

- ¹⁶ Jawen jancha chanima inun jawen yunuti kushipa pepa dasibi mai pakea jiwebaunabu anu jayaxankanikiki.
- ¹⁷ Jawen yunuti kushipa pepa beneidan, jawa jawen datetima unanuma jiweti ipakexanikiki.
- ¹⁸ Enabu jiweidan, mae pes daka anu jiwxexankanikiki, jawa dateamadan, janu jiweabu tsuan jatu metidubuma anudan.
- ¹⁹ Jaska inun, badux ui nidi ikin ni xukua yamawaya ja maewan babubiaya
- ²⁰ ui midima ikin matun yunu cha aka beneaya janua matun burro inun matun ina awan piti basi benemakin pewaya matubudan, benimai man jiwekunkainxanaii.

Nukun Xanen Ibun nuku meke taewai juxanikiaki, na janchadan

33

¹ Man jatu chakabuwamis tsuan matu kupikin chakabuwadiama, ¡man peidawa!

Jawa banabimama juni betsa padantan man jatu achimis matudi tsuanda matu padanxanaidan, ¡man peidawa!

Matun dukun jatu chakabuwakin man keyushinken matudi chakabuwakin yamawaxankanikiki.

Jawa jatu banabimama man jatu achimakin keyushinken matudi achitan iyudiaxankanikiki.

² Jehová Diosuun, miki chiti ikin nun mia manaii. ¡Nukuwen nuidiwe!

Penama tibi min kushipawen medabewakin nuku uinmakubainwen. Nun bika teneaitian nuku medabewakin piskumakubainwen.

³ Ja mae anu jiweabu min jatuki sinatai ninkabaini paxamisbuki. Min nuku medabewai juaya

nawa xukubaunabu detenamenikabu paxai sa ibainxankanikiki.

⁴ Janua nawa betsabudi shini midima keskabu bekin ja nawabuki jatuki sinatai

nidi ibidan jatu maematan

jatun mabu pepa jatu mebinxankanikiki.

⁵ Naiudidan, Jehová Dios xanen ibu dasibi binu keyua jiweaki. Ja nukun Diosunan, Sión anu jawa kanetiduma inun

jawen yunuti kushipa pepawen achixanikiki.

⁶ Badi tibi jawenabu jawa putama jatu mestenwankubainmiski.

Jawen unanepati inun jawen chakabu inun pepa unantidan,
jadan, keyuisma pepajaida jiweatun nuku piskumatiduki.
Diosun matu jawen datemaidan, jawendua pepa meseki.

- ⁷ Ninkakanwen. Juni detenamenikabu kushipabu
bai tanabidani sai sai ikaibu
jabu jaki sinataibube unanuma jiwenun ika
jatube yubakabiatanshina ja xanen ibu janchaxunikabu ma
kaxakanikiki.
- ⁸ Jatun bai anu ana jadi mapuabuma inun
tsua janu buabumaki.
Jatube yubakai janchanamekin daya yuishinabu ma mexteabuki.
Tsua jatuki mesekein jatu ninkabumaki.
- ⁹ Ja mai pakea anu jiweabudan,
punu nukai juinti nishmatan kaxakanikiki.
Líbano ji xukua jamen jawen pei jawendua ibaima ma xanai
dakekanikiki.
Napanpa Sarón jawendua ibiamis betsai ana jawa jayamaikiki.
Basán mae inun Mati Carmelo mai pepajaidabia betsai
janu ana jawa jayama mai beden aka keskabuki.
- ¹⁰ Jaskabiaibun Jehová Diosun yuikin:
“Natianan, eska en aka en matukidi shinaiin.
Ean en jatu binu keyua xanen ibu kushipajaida
dasibibu en kushipa en jatu unanmakatsis ikaii.
- ¹¹ Man jaska yubakamis inun man jaska dayamisdan,
matubudan, man xeki xaka keska inun
man chaka ichawaxun putamisbu keskabuki.
En xun akaya chi ketikainkin dasibi achi keyutiduki.
- ¹² Enabuki sinataibu ja nawabu en chiwen
jatun yuda menua mapu bestitidubuki,
muxa mexteimabu chiwen kua keska jatu wakinan.
- ¹³ Man chai jiweabunan, jaska en ashian man ninkaxanaii.
Ja inun, man udama jiweabunan,
en kushipa unankin man uinxanaii”, ikaya
- ¹⁴ Sión anu juni chakabu jiwexun chakabuwamisbu
datei jabu saki saki ikaibun
jabu patapai chakabumisbu date paepakin
jabun yuikin:
“Diosun chiwen nuku kupikin yamawai inun
jawen chi nukaisma ikibi ikanudan,

nukubudan, ¿tsuabu nun jadi jiwetidubumen?” ikaibun

¹⁵ eskabu besti jiwexun yuimisbu, jabu paxatiduki.

Jabu pe jiwekunkainkin jancha chanima yuimisbu inun,
jabu mabuwen kemui jiwekin betsabu ichakawaisbuma inun,
mabu inankuin bitan jatu jawen padankin jatun shinan betsa
wamaisbuma inun,
pubenbun shinan jabun ninkatan jatu chibainsma inun,
chakabuaibu jatu uinkin chibankatsi ikama bekua keskaxun
shinanmisbudan,

¹⁶ jabudan, chanima jatun jiwea mestenki.

Janu paxai jiwei meketidubudan,
jatun jiwe kushipadan, mishki jiweki.

Jabu jiweabu anudan, piti jamen ikai inun unpax jawa yupama
ixankanikiki.

¹⁷ Isaásin ana jatu yuikin:

Dasibibun ja xanen ibujaida jawen kushipa
chaxa chaxa ikai matun beduwen man ana uinxanaii.
Chajajaida jiwebiabaunxun jawen mai pakea ana xeka ibubis man uinxanaii.

¹⁸ Jaska betsapawen matu bika tenemabu

ja shinain man jawen datei jiwemisxun yuikin:
“Jabun nukun pei impuesto bitan tanamisbudan, ¿jania?
Jabun nukun pei impuesto bitan jawen xankama unantiwen
unanmisbudan, ¿jania?

Nukun uinbaunti jiwe keyatapa anuxun jabu nukuki sinataibu
beaibu bechinun ixun uinmisbudan, ¿jania?”

¹⁹ Jancha atimapabube ana jatube jusia jiweama inun

nawabun jancha bikajaida man jaskatan ninkatidubuma anu
man ana jabube jiweama ixanaii.

²⁰ Sión maewan uinkanwen,

januxun Dios kenwain nun besi peaibudan.

Ja Jerusalén maewan kushipa
januxun tsuan matu ana bikawatiduma anu shinankanwen.
Ja maewan, tadi jiwe puntekin mestenwan keska
tsuan jawen nichin tibi betsetidubuma inun
jawen dispi tesatidubuma keskaki.

²¹ Janu Jehová jawendua kushipa pepa

nukube jiwexun nuku uinmaxanikiki.

Ja maewan anu jene jaxpa jabai kushipai jayaxanikiki.

Janu matuki sinataibu jabun matu detenun ika jatun xaxuwán tuein
mapuabu kushipabu

ja jenewen ana jikitan mapuama ixankanikiki.

- ²²⁻²³ Ja xaxuhan nachankanki jawen dispi tibiki ja tadi jaki puntea niwe bekin ana puntes wamawen taea ja tadi pea pea itiduma ixanikiki. Jatun xaxuhan ana jadakidi katidumaken jaki inatan jabu nukuki sinamatibun mabu pepa dasibi mapematan mabu nun paxkaibun bekunbu inun tekeyabundi jabuna bixankanikiki. Ja jaskaibutianan, Jehovádan, nukun Xanen Ibu inun, nukun unantinanika inun, nukun jancha pewatan chibanmanika ixanaiwen taea jatun nuku piskumaxanikiki.

- ²⁴ Jaskaibutian ja maewan anu jiweabu betsa taska:
“En isin tene jayaki”, iwanan, yuialma ixankanikiki. Jerusalén anu jiweabu chakabumisbu Jehová Diosun jatun chakabu ana shinanma jatu buaxunxanikiki.

Sión mae anu yudabu ana chintunxankanikiaki, na janchadan

35

¹ Janu tsua jiweabuma anu mai tsusin benimaxanikiki.

Jua jawendua tueaya benimaxanikiki.

² Jua ichapa jawendua tueaiwen mai tsusin benimai shinan chankanxanikiki.

Ji jawendua Líbano keska janu tsua jiweama anu Diosun jawendua jaida waxanikiki, Mati Carmelo inun napanpa Sarón jawen mai pepa keska wakinan. Diosun jaska wakeakeaya dasibibun jawen kushipa jawendua uinxankanikiki, nukun Dios jaska xanen ibu pepajaida ikunkainayadan.

³ Januxun babubu jatu shinan chankanwankin punu nukabu jatu kushipa wakanwen.

⁴ Datebu jatu yuikan:

“¡Ana dateama benimadikanwen!

Na jibia matu dapiki, matun Diosun matu piskumakatsidan. Matu meketan matuki sinataibun jaska bechipaimisbu keska jabun chakabumiswen jatu kupikin tenemaxanikiki.”

⁵ Januxun bekunbu bepexetan uinxankanikiki.

Patabu pape ikin ninka pewaxankanikiki.

⁶ Mestentiya tidi iki mapuabu chaxu ishchumisbu keskai bintu bintu itan titi ixankanikiki.

Juyubu jancha pesei sai sai ixankanikiki.

Janu tsua jiweabuma anu mai tsusin anua jene tuebaini paxkukaini kushibainxanikiki.

- ⁷ Janu tsua jiweabuma anua betsai ian tsauxanikiki.
 Mai tsusinjaidabia janu paxku debu ichapa jayaxanikiki.
 Natian janu kaman inu besti jiwmis anudan,
 tsu ati tawa inun ja una wati basi pepa benexanikiki.
- ⁸ Jabianudi kapuketi bai betsawen kena kenakinan,
 “Bai Medibi Diosunaki”, axankanikiki.
 Tsuabunda jatun chakabu pewai chukisbuma ja baiwen
 butidubumaki.
- Ninkaisbumadi janu mapui jawen kapuketidubumadiki.
- ⁹ Ja bai anu inu betsawen león jayama inun
 yuinaka mese piananbu jadi buama ixankanikiki.
 Ja bai medibi anudan, chakabun jatu tsumani
 Diosun jatu peka ana chakabuuma
 janu mapui chintunbidanxankanikiki,
- ¹⁰ tsuabuda Diosun jawenawakin jatu binidan.
 Jawen maewan Sión anu jikibaini kantai benibainxankanikiki.
 Jadi jikiton jiwea benimai jeneama ipakexankanikiki.
 Jabudan, benimai shinan chankan bestixankanikiki,
 jadia ana kaxai bika tenei een ikama yamakaini pes dakaxanikiki.
- *****

**Diosun Jerusalén anu jiweabu ana jatu medabewakin
 jatu daewaxanikiaki, na janchadan**

- 40** ¹ Eska matun Diosun matu yuikiki:
 “Enabu medabewai jatuwen nuikin ea jatu daewaxunkanwen.
- ² Jancha duapawen Jerusalén anuabu medabewakin ea jatu jancha
 waxunkanwen.
 Jatu yuikinan, matu tsuma wanixun matu dayamamisbudan, ma
 keyuaki.
 Man kanechakayamakubainmiswen taexun
 en kupiti kushipajaida bestikima en ma matu tenemakubainimaki.
 Jaska memakin matun chakabu en ma matu pakamaimaki”, ikaya
- ³ janiada jui taxni sai ikin yuikin:
 “Janu tsua jiweabumanu bai pewakin
 Xanen Ibun bai pesaxunxankanwen.
 Janu jawa jayamajaida anu bai yushtuma wakin kayatapinbainkin
 nukun Dios bai pewaxunxankanwen.
- ⁴ Napaku tibi pewakin mai mata wakin
 mati matipa panpa wakin
 mai xantu xantupa inun mati matipa betsawen
 dasibi sapa wabainkin pewaxunxankanwen.

⁵ Man ma jaska waxunken
januxun Xanen Ibun jawen kushipa pepa jatu uinmai juaya
dasibi yudabu jaki ichaxun uinxankanikiki.
Jamebi Xanen Ibun jaska yuikiki”, ikaya

⁶ janiada jui ana taxni sai ikin ea yuikin:
“¡Sai iwe!” ea waya
Ean yukakin: “¿Jadakidi sai ipa?” en aka
ea yuikin: “Yudabu dasibidan, basi keskabu bestiki.
Jatun kushipadan, ni jua keska bestiki.
⁷ Xanen Ibun jatu mamakixun xun akaya
basi chushi inun jua utsi xanamiski.
Yudabudan, chanimajaida basi keskabu bestiki.
⁸ Basi chushiaya jua utsi xanamiski.
Jakia nukun Diosun janchadan,
ja besti jawa betsama mesten ipakenunbadikiki”, ikin

⁹ Síón yuikin: Siónaan, mati keyatapa jawen jenea mamaki mapeketan
jui kushipawen sai ikin kaka pepa chaniti jatu banabimadiwe.
Jerusaléen, jawa dateama min jui taxnimakin
kaka pepa Judá maewan tibi anu jiweabuki jatuki eska chanidiwe:
“¡Na jabia matu dapiki, matun Diosdan!” jatu wakinan.

¹⁰ Uian. Xanen Ibu jawen kushipaya
jawen pe yunutiwen jatu pe mekei ma juikiki.
Jawenabu medabewakin jatu piskumatan
jatun manakuti pepa jatu inanxanikiki.
¹¹ Chaxuwan mekenikatun jawen chaxuwan xukua jatumekemis keska
wakin
chaxuwan bake bitan
jawen xuchi anu ikubainkin inun
dama kain benabu meke pewamisbu keska wanun ika ma juikiki,
nukun Xanen Ibudan.

Israelin Dios ja kayadan, kushipajaidakiaki, na janchadan

¹² Ianenwan itamamai panidan,
¿tsuan jawen meken janakubainkin ma tananimen?
Nai natukanan, ¿tsuan jawen mekenen meshantan ma
tanakubainimen?
Mai mishpu kudu mai jidabi anuadán,
¿tsuan ichawaxun kukiki ma tananimen?
Mati tibi betsa betsapadan,
¿tsuan ma ichawaxun ma pisa keyunimen?

- ¹³ Jehová Diosdan, ¿tsuan jawen shinan unanti wakin
medabewanimen?
¿Tsuau medabewakin yusinimen?
- ¹⁴ Jau Diosun ninkatan yunu pewanunan,
¿tsuan jawen shinan betsa inanimen?
Kaneama pepa inun chakabu jau unanti wanunan,
¿tsuan yusinimen?
Damini inun yumeai jau unanun, ¿tsuan tapinmanimen?
Jau unanepanun, ¿tsuan jawen shinan tapinmakubainimen?
- ¹⁵ Diosun shinanan, eskaki.
Nawa xukua tibi uiainan, unpax tusua keska bestiki.
Pisati anu mai mishpu bestichai jana keskabuki.
Ianenwan anu natukan mai tibidan,
jawen kadudan, mashi bedu bestichai keskaki.
- ¹⁶ Mai pakea Líbano dasibi ni xukua anua
jaska Diosun yuinaka bechipai keska menuxuntidubu damaki.
Ja inun, jabianudi kadu waxun ja yuinaka menutidubu damadiki.
- ¹⁷ Nawa xukua tibi dasibi jiwebaunabudan,
ja bebunuadian, jawamajaidabuki.
Jatun jabukidi shinanan, jawenadan,
jamen jawa kadumajaidaki.
- ¹⁸ Matubun Dios man unanti wakin shinanan,
¿jadatu keskamen?
¿Jadatu dami besu keskamen?
- ¹⁹ ¿Juni yuda dami wanikatun
juni keska wakin dami wamisdan,
jaska keskamen, Diosdan?
Tsuanda mane dami wakin juni wa
januxun oro pewanikatun jawen yuda orowen puxatan
plata mane dispi chiwetameya sawemakin
jawen yuda kainmamiski.
- ²⁰ Jamen jabu pei jexe jayamatun ji kushipa katutan
ji dami wanika unanajaidai bechitan yunukin
dami jamebi tin itiduma jatu amamiski.
Jaska keskamajaidaki, nukun Diosdan.
- ²¹ Matubunan, ¿jaskadan, man unanmajaidamen?
Jaska yuinibudan, ¿man ninkaismamen?
Bebunkididan, ¿matu yuiama inibumen?
U unu mai dami waitianan, ¿ninkakin man unanma inimen?
- ²² Nukun Diosdan, nain mai achia mamaki

- jawen xanen ibu janu tsauti jayaki.
 Jadi tsauxun junibu uinkinan, shini keska jatu uinkiki.
 Naiwen jatu achi keyukin jawen jatu bepu keyuaki.
 Tadi jiwe chumia jatu puntea keska wamiski.
- 23** Juni xanen ibubiaken betsa wakin jawama jatu wamiski.
 Mai anu yununika kushipabubiaken jatu mitanuma wamiski.
- 24** Jabudan, miban betsa dama banabu
 jatun tacha mai anu jawen tapun jayadiama mestendiamma keskabuki.
 Diosun jatu mamaki xun aka chushimis keskabuki.
 Uiyabi niwewan bekin jawen pei xana nuyamabainmis keskabuki.
- 25** Dios medibitun junibu yukakin:
 Matubunan, ¿en tsua keska man ea shinain?
 ¿Tsua ea keska itidumen?
- 26** Bewenikitan naiudi matun beduwen uinkanwen.
 Ja dasibidan, ¿tsuan dami wanimen?
 Jaska bishi tibi chaxa kaiankeakeai
 jatun kenawen en jatu kenamiski.
 Jaskawen taea Diosun jawen kushipa tibiwen jatu mekea jatun chaxa
 jawa benutidubumaki.
- 27** Jacobun enabu Israelbuun,
 ¿jaskai man ja ikai?
 ¿Jaskakin man eska yuiai?:
 “En jiwe chakabiaken Jehová Dios ewen nuikin ea medabewamaki.
 Diosun ea shinanmaki”, ikin
- 28** matubunan, ¿man unanmamen? ¿Man ninkaismamen?
 Nukun Jehová Dios ikibi ini mai jidabi bawakin dami wanidan,
 jadan, punu nukatiduma inun jin itidumaki.
 Jaska dasibi shinankin unan keyuai tsuan ninkakin tana keyutidumaki.
- 29** Punu nukabu ana jatu kushipa inankin
 babubu medabewakin ana jatun yuda kushipa wamiski.
- 30** Bedunanbubia punu nukai juinti nishmatidubuki.
 Kushipabubia jin iki di itidubuki.
- 31** Jakia tsuabuda Jehová Dioski chiti ikabudan,
 ana kushipa bena jayakubainkanikiki.
 Kushikaini jawa punu nukatiduma inun
 bai tanabaini jawa babutidubumaki,
 ishmin jawa pexukuama nuyakaunai keskaidan.

**Diosun Israelin enabu jatu yubanixun ana jatu
 medabewanikiaki, na janchadan**

41 ¹“Mai pakea Mediterráneo Ianenwan kexa anu jiweabuun,
 janchama pestan ea ninkakanwen.

Ana dateama juinti kushipakanwen.

Jaska man sinatanamemisbudan, nedí ichai bekanwen,
jaska en matu amamiskidi nun janchanunbunan.

² Badi juaikidia ja xanen ibujaida Cirón nawa xukuabu tibi
maemakubainmisan,

¿tsuan yunumakin amakubainmismen?

Ja nawa xukuabu tibi jatun xanen ibu babu watan

jatu tsuma wamakubainmisan, ¿tsuan amakubainyamamen?

Jatun machatu chaipa inun jatun kanun piayabis tekekin mesi watan
pechush sa akawakinan, ¿tsuan jatu amakubainyamamen?

³ Jatuki sinataibun jatu chibaniabainabu

jawa tsuan jatu meama unanuma jatu dete dete abainkin
jatun taewen kati bai metsamaisma keska wakin,

¿tsuan jatu amakubainyamamen?

⁴ Dasibi jaska watidubu daya amakinan,

¿tsuan jawen shinanen jatu taewamanimen?

Janu yudabu dami wakin taewatan jaska jau jiwekubainxanunbun
jatu yunukubainkinan, ¿tsuan jatu akubainmismen?

Eadan, en jabia Jehová ea besti Dios kayabitun
en jatu yunukubainmiski.

Ea dukun en ini inun

jawen jenei en idiakunkainxanaii.

⁵ Ianenwan Mediterráneo kexa anu mai pakea tibi anu jiwebaunabu
jaskaibu uin date paepaibun

mai jidabi kesuakea pacha sakui taka taka ikaya
dasibibun chaimaxun uinun ika bexankanikiki.”

⁶ Jabun mabu wanikabun jawen jaibu mabu wanikadi medabewakin
jatu shinan chankawamisbuki.

⁷ Dami wakin ji mabu wanikatun jawen jaibu oro mane inun plata
mane wanikadi benimawamiski.

Jawen mastatiwen mane dami wakin sapa wanikatun

jatun mane mabu chusha chusha anika benimawadiamisbuki.

Januxun dami menekin ma keyutan

ja mane tsis anika yuikin: “Min pejaida wamiski”, atan
januxun ja dami jau dabeke dabeke iyamanun

pidikuwen mestenwankin mastamisbuki.

⁸ “Jacobun enabu Israelbuun, ea ninkakanwen.

Ja bechipaikin en katuni en tsuma en jaibu Abrahamnen man jawen
bababuki.

⁹ Mai uke betsaudia ean en matu kenaniki,

- chajaida ianenwan dexun betsaudia matu katukinan.
 Januxun matu yuikin: ‘Matudan, man en tsumabuki’, akin
 ean matu katunixun en matu danainsmaki.
- ¹⁰ Dateyamakanwen, en matubekidan.
 Dateyamakanwen. Eadan, en matun Dioski.
 Matu medabewakin en kushipa en matu inanmiski.
 Ea kushipa binumamistun matu tsumaxun
 jawa matu jeneama en matu mekekubainaii.
- ¹¹ Dasibi jabun matu danainbu en jatu dakewa babuxankanikiki.
 Jabu matuki sinatakin matu detemisbu manakukin
 en matu jatu yamawaxunxanaii.
- ¹² Matuki sinatakin matu detemisbu ana jayamenkain ikin benai
 man jawa jatuki nukutiduma ixanaii.
 Jabun matu achitan jatidi matu detekin
 jatidi matu ibu wabainmisbudan,
 jawa jabun matu jaska wabuma ini keska man jatukidi shinanxanaii.
- ¹³ Jakia eadan, Jehová Dios en matun mekenikatun
 matu metsuntan yuikin:
 ‘Ana jawa dateyamakanwen, en matu medabewakubainaiwen
 taeandan’ ”, akin
- ¹⁴ Jehová Diosun jawen jancha mestenwankin yuikin:
 “Jacobun enabu Israelbuun,
 ja man texeishtani man babubiadan,
 jawa dateyamakanwen, en matu medabewaidan.
 Eadan, Israelin Dios medibidan, en matun piskumanikaki.
- ¹⁵ Matubudan, jawen mai xexabainti xeta benaya keska en matu
 waxanaii.
 Mai xexabainkin mati tibi panpa wakin man mishpu waxanaii.
 Mati mishtin xekiwan xaka keska man waxanaii.
- ¹⁶ Man jatu beka beka aka niwen jatu buxanikiki.
 Niwe shubi shubi ibidakin sa abainxanikiki.
 En matu jaska waya matubu man benimaxankanaii.
 Israelin mekenika en Jehová Dios medibiwen man kenxankanaii.
- ¹⁷ Enabu nuitapai jawa pei jayabuman unpax benabiai
 ibubis bechiabumaki.
 Unpax manui jatun jana taxkai tetsusinbiaibun
 jakia ea Jehován en jatu amaxanaii.
 Israelin mekenika Dios eanan, jenekin en jawa jatu putabainama
 ixanaii.
- ¹⁸ Janu tsua jiweabumanu mati keyatapa anua en jene jabamaxanaii.

Napaku anu chacha tibi en tsauñxanaii.
 Janu tsua jiweabumanu ian pishta wakin en newexxanaii.
 Mai metu anu en paxku jabamabidanxanaii.

¹⁹ Janu tsua jiweabumanu mai metu anu ji tibi en benemaxanaii,
 kuxadan, olivodan, cípresdan, ji pepa betsa betsapa benemakinan.

²⁰ En Jehová Israelin Dios Medibitun dasibi dami wakin
 en kushipawen en akeakeni
 jau mai jidabi anu manibaunxun uinkin ninkakin tapinkin
 jau unanxanunbun en jaska wakeakekubainxanaii”, iniki.

Yushibu tibi kenwainan, jamenkiaki, na janchadan

- ²¹ Jehová Dios Jacobun Xanen Ibjujaidatun yuikin:
 “Damibuun, bexun matun kushipakidi ea uinmai bekanwen.
 Jawada man amis bexun akin ea uinmakanwen.
- ²² Matu ninkanun uatian ixanai nukuki chanikanwen.
 Uatian ma iyamakidi nuku yusinkin unanmakanwen.
 Jamapai tibi ixanai nukuki chanikanwen,
 jaska kaintan keyuxanai nun uinxanunan.
- ²³ Jaska chipu kainbidanxanai nuku banabimakin yuikanwen.
 Jaska chanima man diosmenkain, nuku xabakabi uinmakanwen.
 Jaska man atidu pepa kasmai chakabu nuku axunkanwen,
 matuki date paepai nun mesenunbunan.
- ²⁴ Ean en matu uianan, matubudan, ¡man kushipa jayamajaidabuki,
 man jawa dami betsa watidumajaidadan!
 Jabu unainsmapakin man dami katumisbudan,
 ¡man peidakawan!
- ²⁵ Xanen ibujaida Persia badi juakidi jiwea en kena nortekidia
 taxnikidanxanikiki.
 Xanen ibu betsabu jatu achikin
 jawen taewen pupus pema pema abidankin akawaxanikiki,
 mai mabu wanikatun jawen taewen mapu pewakin katadankin biyu
 biyu amis keska wakinan.
- ²⁶ Jaskai nun uinun badinun bebunkidijaida ja xanen ibukidi,
 ¿tsua jatuki chaninimen?
 Ja junin axanai chanima bebunkidi yuini jaskawen taexun
 nun e itan unantidubudan, ¿tsuan animen?
 Damipaan, jawa betsa taska man chaniamá iniki.
 Man ja xanen ibukidi janchai jawa jancha man yuiai
 tsuan jawa ninkamajaida iniki.
- ²⁷ Jakia ea Jehová Diosunán, bebunkidi Sión anuabu
 jatuki chanikin en unanmaniki.

Jerusalén anu en jancha yuixunika en yununiki,
ja Israelin enabu jawaida chintunxanaibu jau jatu yuinunan.

28 Ean en uianan, jawa dami yushin betsa taxniamaki.
Jadatuda yushin damipan medabewakin junibu yusintidumaki.
Matun yushin dami en jatu yukabia ea jawa kematidubumaki.

29 Ja yushin dami tibidan, jawama jamenki.
Jawa dami watidubumajaidaki.
Jawa kushipa jayama dami bestibuki.”

Jawen tsuma katunikidi Jehová Dios jatuki chaninikiaki, na janchadan

- 42** **1** Dios jatuki chani: “Uinkanwen. En tsuma en katunidan,
en bechipaiai ea benimawamiski.
- En Yushin kushipa en yunua medabewaya
ja en tsumapan jawen yunuti kushipa pepakidi
yudabu xukuabu tibi yuibaunxanikiki.
- 2** Jawen jui kushipawen jawa janchama
unanxubida janchai jawen jancha kaiain
bis bis ikamaken bai namaki mapuxun ninkama ixankanikiki.
- 3** Chanimajaida jawen yunuti kushipawen chakabu maemakin
binudiam
yudabuwen nuikin tawa yushtu puaka keskabu
juinti babubiabun jatu dananma ixanikiki,
bin paji ibubis nukabiaya nukawama keska wakinan.
- 4** Januxun jawen yunuti kushipawen chakabu binudiam
jawa juindukuanma inun jawa punu nukai unanyamasama ixanikiki.
Nawa xukua betsa betsapabu Ianenwan Mediterráneo kexa anu
jiwexun
en tsumapan jancha ninka pewaxankanikiki”, aka
- 5** Ja Jehová Diosun nai jidabi dami wakin kainmani inun,
mai dami wakin taxnimani anu jaki jamapai benemisbu inun,
yudabu jaki jiweabu jiwea jatu inankin jatu juinsinamamistun
jawen tsuma yuikin:
- 6** “Ea Jehová Diosun en mekenen mia metsunxun en mia kenaniki,
jau mia ikunwain minwen taea ea anu piskuxanunbunan.
Mia jaska wamakatsi minwen en yubakaniki,
nawa xukuabu tibi unanti wati bin pelexa keskakin
min jatu chaxa waxanunan.
- 7** Jaska wakin bexuxbu min jatu uinmaxanaii.
Bichiti jiwe medan jatu bichiyamabu min jatu taxnimaxanaii,
tsuabuda meshu anu jiwea keska jatu taxnima keska wakinan.
- 8** Eadan, en Jehováki, en kena kayabidan.

Jau tsuada betsan en kushipa jawena keska wakin
 jau madias duawayamanunbun en jatu yunuismaki,
 jancha pepawen ea besti duawakatsi ikama
 dami yushin duawaibuwen taexunan.

- ⁹ Uatian en matuki chaninidan,
 dasibi bebunkidi en yuini en ma akin keyuaki, menekinan.
 Na jabiatianan, ana jaskaxanai bebunkidi kaka bena en matu
 tapinmai,
 matu bebun taxnidiamma bebunkidi man unankubainxanunbunan.

Dios kenwain kantai jawenduakin benimawatikiaki, na janchadan

- ¹⁰ Kantati bena betsawen Jehová Dios kantaxunkanwen.
 Nenumajaida mai kesua anuxun kenwanbaunkanwen.
 Tsuabuda man ianenwan xaxuanwen mapuabu inun,
 man ianenwan medan yuinaka jiweabu inun,
 mai pakea tibi ianenwan kesua anu man yudabu jiweabunan,
 Dios kenwankanwen.
- ¹¹ Mai tsusin jawama anu inun ja maewanibu,
 jau benimanunbunwen.
 Quedar nawabu jatun tadi jiwenen jiweabu
 jau benimadianunbunwen.
 Selá mae anu jiweabudan, shinan chankain jau kantanunbunwen.
 Ja dikabi mati keyatapa betsa binu keyua mamaki mapeketan nia
 min juiwen
 benimakin mimawakanwen.
- ¹² Ianenwan kexa mai pakea tibi anuxun
 Jehová Dios pepawakin xabakabi duawakin jau kenwanunbunwen.
- ¹³ Jehová Dios jawa dateama mentsisipa keskai kainkidanxanikiki,
 jatu maematanun ika detenamenika keskai bebukainidan.
 Jatu maemanun ika bui jadi sai sai ibainmisbu keskakin
 jawen jui taxnimaxanikiki,
 jaska kainkin jaki sinataibu yamawanun ikadan.”

- ¹⁴ Jehová Diosun ana yuikin:
 “Jatixuinda en nishma dakani inun en pes dakanidan,
 en jui en ana meketidumaki.
 Jakia natian ainbu bake kainun ika bis imis keskai inun,
 ana teneama tsekeden imis keskai en jaskaxanaii.
- ¹⁵ Mati keyatapabu inun mati jatiubuma yamawakin
 dasibi ni jukunmisbu en tsusinwankin keyuxanaii.
 Dasibi jene netsukin mai tsusinwankin en jawa jayama waxanaii.
 Ian tibidi en netsu keyudiaxanaii.

- ¹⁶ Bexuxbu jatu iyukinan, bai tanamabainkin
janu uin buisbuma anu en jatu iyuxanaii.
Meshu anu buaibu jatu bebxun bin jatu chaxawaxunkin
mai chakabu panpa wakin bebunkidi jawamawakin en jatu
pewaxunxanaii.
Na jabu jaska tibidan, jawa yupatidubuma en jatu axunxanaii.
- ¹⁷ En jatu jaska wabainaya dami yushin inun jawen kenwanti tibi
tsuabunda jatu yuikin:
'Matudan, man nukun diosbuki', jatu amisbudan,
jabudan, jatun damiki dakekin jenebainxankanikiki", itan
- Israelbudan, bexux keska inibukiaki, na janchadan**
- ¹⁸ Diosun ana jatu yuikin:
"Patabuun, ninkakanwen.
Bexuxbuun, shinankin unankanwen.
- ¹⁹ Israel en jancha bunika wakin en katubiani
yuda betsabu tsua jaskamabiaken
Israelbu en jancha bunikabubia
man bexux keskabu inun man pata keskabu man en tsumabuki.
- ²⁰ En betsa betsapa matun bedubi axuain uinbiakubidani
ja shinankin man uinkatsi ikabumaki.
Ninkabiakin man jawa ninka pewabumaki.
- ²¹ Jehová en matun Dios piskumanikatun
en yusian jawenduawen en matu e imati ewapa axunbiakubaina
- ²² jakia man Israelbudan, matuki sinataibun matu anua yumetsukin
inun
matun jamapai mebin keyubainkin
matu achitan dasibi matu bichikin iyumisbuki.
Jadi matu bichimabu tsua matun medabenan kaxun
matu kainmakin bepenxuinsmaki", ikaya
- ²³ januxun Isaíasin jatu yuikin:
"Matus jaska wabia,
¿jaskakin uintan man shinan betsa waisbumamen?
Jamen jaskaxanaibudan,
¿tsuan jaska ninkakatsis ikimenkain?
- ²⁴ Jacobun enabu, Israelbudan, jau jatu achitan bichixanunbun
¿tsuan jatu yununimen?
¿Chanimen, Jehová Diosun jatu anidan? Chanimaki.
Jabu Dioskidi chakabujaidakin
jawa chibar pewama bai kayatapia jatu unanti wamabiakubaina
jawa jawen yusian ninkakin chibanzunabumaki.

²⁵ Jaskawen taexun Dios jabuki sinatakin kupikin
detenamenikabu Diosun yunua jawaqidabidan chiwen jatu kuaniki.
Jatu jaska wabia jawa betsan taska uintan tapinkatsi ikama inibuki.”

Jehová Dios ja besti piskumanikakiaki, na janchadan

43 ¹Jakia natianan, Jacobun enabu Israelbuun, ninkakanwen.

Jehová Diosun matu dami wanitun matu yuikin:
“Dateyamakanwen, matu iyunibu jadia jatu putamabidankin en
matu taxnimabidanimaki.

Ean matu katunixun matun kenawen kenakin ena en matu waniki.

² Man jene pukebainaya en matubetan pukekubainxanaii.

Jene besusi pukebaini man jasama ixanaii.

Matumebi man chi anu napukubia man menuama ixanaii,
ja jedepan matu dawakada akamadan.

³ Eadan, en Israelin enabun Jehová Dios medibi matun
piskumanikaki.

Matu taxnimakanan, matu ana ena wakin bikatsis ikin
ja nawabu Egipto inun, Etiopía inun, Sabá jabun matu ichakawaibu
jatu matu kupixunkin Persia nawabuwen en matu
taxnimabidanxanaii.

⁴ Matu yaushijaidakin matu benukatsi ikama en matu bechipaiaii.

Matun jiwea piskumatan matu benukatsi ikama
junibu inun mai pakea tibi jadi en matu inaniki.

⁵ Dateyamakanwen, en matube niakidan.

Matunabu ana ichawakin nenuma badi juaikidia inun badi kaikidia
jatu iwekin en chintunwanxanaii.

⁶ Nortekidi jiweabu ean jatu yuikin:

‘Enabu ea ana jatu nichinxundikanwen’, akin

surkidi jiweabu jatu yuikin:

‘Enabu ana jadi yaushiamma

en juni bakebu inun en ainbu bakebu

nenuma mai kesukauna anua ea jatu iwexundikanwen.

⁷ Dasibi enabu en kenaya

jabun ea duawakin yudabu en kushipa jau uinmaxanunbun

jatu dami wakin en bawanidan, ea anu ana jatu iwedikanwen’ ”,
iwanan,

⁸ “Enabudan, ea anu nichinkanwen.

Jabudan, beduyabia bexuxbuki.

Pabinkiyabia ninkaisma patabuki.

⁹ Mae tibi anuabu inun nawabu man xukuakeakeabudan,
janus jatube man ichatiduki.

Jaska Diosun jawenabu medabewai kai
 ¿tsuan bebunkidi unantan yuitidubu ikimamen?
 Jaska chanimamenkain, tsuanda uinmaxun nuku bebunua
 chanikanwen,
 nun ninkanunan, jaska yui kayabimenkainan”, ikin

- ¹⁰ Jehová Diosun jawen jancha kaneama mestenwankin:
 “Jabia man matubuki, en chaninikabudan,
 man en tsumabu inun ean en matu katunidan.
 Ea unantan ea ikunwain eki chiti ikin
 en Jehová Dios dasibi binua
 man ea unanunbun en matu katuniki.
 En idiamaken tsua dios betsa jayama iniki.
 Ja inun, uatian ea kachu betsa jayatidumajaidaki.
- ¹¹ Ea besti en Jehová Dioski.
 Eamaki jawa tsua betsa piskutidubumaki”, itan
- ¹² Jehová Diosun jawen jancha kaneama mestenwankin:
 “Ea bebunkidi matuki chani janchanixun piskumakin en matu
 paxawaniki.
 Yushibu betsan matu mekekin matu axuanma ini matun ibubu inun
 matubunan, uinxun man unanjaidaii.
- ¹³ Ea en taxninidan, jawa betsama jabias en ipakeaii.
 En kushipa mebinkin tsuan ea jenematidumaki.
 Jawada en akai tsuan ea binumakin chakabuwatidumaki.”
- ¹⁴ Israelin Jehová Dios medibi
 jatu mebikinankunkainmis jatuki chani:
 “Matu jadi paxawakinan, Babilonia junibu en jatu yunuxanaii.
 Jadia matu taxnimabidankatsidan, bai tibi en matu bepenxunxanaii.
 Caldea nawabun matu iyui matuwen benimabiabainibu jabundi bika
 tenexankanikiki.
- ¹⁵ Eadan, en jabia Israelin damiwanika medibi Jehová en matun xanen
 ibuki.”
- ¹⁶ Januxun Jehován ianenwan medan bai tapintan
 jene mesebiaken janu bai watan
- ¹⁷ detenamenika mentsisipabu jatun detenameti caballo inun jawen
 tadanbainti ja baiwen buaibu
 janu jatu yamawakin ana jaska benitima wakin
 janu besti jatu desunxanikiki,
 bin paji ji ikai nukawa keska wakinan.

- ¹⁸ Jaska waxanaiwen taexun Jehován jawenabu jatu yuikin:
 “Jaska uatian man jiwekunkidanshina ana shinanyamakanwen,
 man bika tenekubidanshina ana jas shinanma jakimaidan.
- ¹⁹ Eanan, man jaska jiweisma betsa bena en matu axuain
 natian taxniai ibubis man uinxanaii.
 Janu tsua jiweabuma anu en matu bai pesaxunxanaii.
 Ja mai anu jawa jukuinsma anu jene tuekin en jabawaxanaii.
- ²⁰⁻²¹ Jabu enabu wakin jau ea kenwanxanunbun en jatu katuni
 jabu ekidi chanibaunxankanikiki.
 Janu tsua jiweabuma inun janu jawa jukuinsmanu
 unpax tuekin en jatu jabawaxunxanaii.
 En jatu jaska waxuna ja unpax akaibun
 januxun yuinaka pianan betsa betsapabu inun, kaman inu inun,
 pupun jabundi ea duawaxankanikiki.
- ²² Jacobun enabu man Israelbu matunan,
 ea kenakatsi ikama eki chikishi man ma ea jakimaki.
- ²³ Ea benimawakin chaxuwani man ea menuxunama inun
 ea duawakin man ana ea jawa inankuinsmaki.
 Man ekidi jakimaya ana matun inankuin inun xeni ininipa:
 ‘Ea inankanwen’, iwanan, matu bika wai:
 ‘Menan, menan’, ikin en matu yukama ikunkainimaki.
- ²⁴ ‘Jawada ininipa peiwen bitan man ea benimawanun’, ikai
 en matu yunuama inun,
 ja binumakin: ‘Yuinaka xeni ea kuaxunkanwen’, iwanan,
 en matu jawa yunuamaki.
 Jamen jaskama matudan, atimapa tibikin ea dananmakin
 chakabukin
 man ea bika tenemakubainaii.
- ²⁵ Man puben sinatapabubiaken ea en matun Dios matuwen nuikin
 matun chakabu ana tanakatsi ikama matu tede axuntan en ana
 shinanma ixanaii.
- ²⁶ En matu jaska wamismenkain, man ea chitekatsis ikaidan,
 unanepa pewanika anuxun pewanankanwen.
 Man ea chitekin pepa kainmaimenkain, chanikin ea uinmai
 bekanwen, nun uinananunan.
- ²⁷ Ja dukun matun xenipabu chakabui taeniki.
 Matun yusinanbun en jancha chibana ea dananibuki.
- ²⁸ En Templo xanen ibu mekenikabun atimapa wakin ea chibana
 pewabumaken
 en jatu bextekubainiki.
 Na jaska tibiwen taexun Jacobun enabu man Israelbu

jau matuki kaxekin nuitapa wayununbun jatu yunukin en matu
jeneniki”, itan,

Jehová besti Dios kayabikiaki, na janchadan

44

¹Jehován jatu yuikubainkin:

“Jacobun enabu man Israelbu inun, man en tsuma en katuabuun,
natian en jancha ninkakanwen.

²Ea en matun damiwakin bawanika Jehovánan,
man kaindiamma matu pe ewawakin en matu medabewakubainiki.
Jacobun enabu Jesurún ninkaisma mishtinbuun, en matu katuni,
man en tsumabudan, dateyamakanwen.

³Man jaskawen taexun janu tsua jiweabumanu
mai jawa beneisma anu paxku wakin en unpax tuea jabaxanikiki.
Matun bababu pepawen duawakin jiwea bena inankin en jatu yunuxanaii.

⁴Jabu yumei paidan, basi jexe sa itan yumemis keskai inun
ji jene kexakea jawen tacha jeneya ewai keska jabu kushipaxankanikiki.

⁵Januxun betsan yuikinan: ‘Eadan, en Jehovánaki’, ikaya
betsan jamebi yuikin: ‘En Jacobun baba betsaki’, ikaya
betsan jawen meken anu kenekin netankin: ‘Eadan, en Jehována
kayabi en jawen yudaki’, akin
jawen kena ana chichikin Israelin kenayabi netandiaxanikiki.”

⁶Jehová Israelin xanen ibu inun
jatun medabenanika dasibi binuatu yuikin:
“Eadan, ea dukun en jiweni inun
en jawen jenea debesekeaki.

Tsuan ea binua Dios kayabi betsya jayamaki.

⁷¿Tsuan en akai keska atidu jayamen?
Ja jaska jaya janchakin jau ea tapinmanunwen.
Dami wakin taewani inun u unu iki kai inun
ma jawada taxni kema bebunkidi yuikinan,
¿tsua chanikin yuitidumen?

Jaskadan, tsua jayamaki. Ean besti en atiduki.

⁸¡En jaskaken benimai dateyamakanwen!
Nenumajaidatian yui ea en chaninidan,
matubunan, man unaiin. Man jaska ekidi chanitidubuki.

¿Dios kayabi betsya jayamen, man unanan?

Jayamajaidaki. Janu paxati betsya en uinsma en jawa unanmaki.”

Jabun kenwanti dami wamisbu Diosun jatu dananikiaki, na janchadan

⁹Tsuabunda jabun yushin dami wamisbudan, jabudan, jamenki.
Ja inun, jabun yushin dami watan bechipaibiamisbu, jamendiki.

Tsuabunda ja dami jamenbiaken kenwainbudan, jabudan, bekun inun shinaunmabuki. Jaskabudan, jatu usain jatuki kaxeti shadaki.

¹⁰Tsuanda mane dami wakin yushin ja kenwanti wakin januxun jaki payumis anuxun jawen kenwanti dios waidan, ja juninan, janu jamapai dayatitianbiaken benumiski. ¹¹Ja dasibi jabuan ja dami kenwanmisbudan, jabu jatuki kaxeti besti ixankanikiki. Ja jabun yushin dami wamisbudan, junibu bestiki. Janu Diosun jatu unanti waitian dasibi ja bebun mapuxankanikiki. Jatu jaska wa babui date paepaxankanikiki.

¹²Jabun mane dami wamisbu jatun dayati mabu shinankanwen. Mane payukin chiwen kuamisbuki. Januxun jawen pewakatsi mane kushipa betsa pewati tsumaxun mastatiwen mastakin pude pude akin jatun punyan kushipawen dayamisbuki. Jakia ja mane dami wanika piama dayakin jawen kushipa keyui inun unpax akama jin imiski.

¹³Ja dikabi jabun ji dami wamisbu shinanankanwen. Jaska wakatsi ikin ji tanatiwen tanamisbuki, lápizwen ja tanamabaunkin dami wakatsi bishakinan, jawen keneti betsa compáswen adiakinan. Jaska watan ji dami wanikan tanamabauni dayakin ji juni keska jawen yuda jawendua watan jatun yushin kenwanti jiwe anu nichimisbuki.

¹⁴Jaska inun, betsadan, tsuanda kuxa banaima uin yumewaima chipu ja kuxa ewaima jayatan dedatidubuki. Jamen jaska wama ni xukua anua ciprés kasmai ji betsa ewapa jamebi yumeima mekekubainkin ewapajaida dedatidubuki. ¹⁵Januxun yudabun jawena watan mekinan, kadu wamisbuki. Tuax betsa kuatan jawen yumisbuki. Tuax betsa kuatan jawen misi bawamisbuki. Tuax betsa dami wakin jawen dios watan ja naman beti itan kenwanmisbuki.

¹⁶Ja yudabu jatidibun ji senke betsa namakis tuax atan kadu watan jatun nami jawen xuixun pi yani wai pepemisbuki. Ja inun, jawen yuui janchai: “¿Jaska kadu dekenepamen? Ea jawaida xana waikiki”, imisbuki. ¹⁷Janua ja ji tuax betsa texea dami wakin jawen kenwanti dios watan ja naman beti itan kenwankin yuikin: “Jawada bika en teneai ea nemaxunkin ea piskumawe. Min en dioski”, akin yuimisbuki.

¹⁸Ja junibudan, jawa unanma inun jawa tapianbumaki. Beduyabia uinkin pewama bexuxjaidabuki. Jatun shinan jatu bepujaida jawa ninka pevatidubumadiki. ¹⁹Jaska wabiakin jawa jawen shinanwen tapin pewama yuikin: “Ja ji senke namakis betsa tuax atan en ketian ji iki dekenxunwen misi en bawaxuki. En nami xuixun pidiaxuki. Jamen ja tuax betsa en ja kuama bitan dami atimapa wakin kenwanti yushin watan ji jamen en kenwaiin”, itidubuki. ²⁰Chanimajaida chi mapu pia keska wamisbuki, jatun shinan chakabun jatu padanjaida pepa jaska jenetan chibainan. Ja junibudan jatun chakabuwen taea jaskatan paxatidumajaidaki. Jawada junin dami watan jawen melenken tsumatan jawen shinan pemawen taea jawa shinan pewama ja dami jatu uinmaidan, ja juni chanichaka bestikanikiki.

**Jehován jatun chakabu buaxuntan Israelbu
ana jatu mekenikiaki, na janchadan**

- 21** “Man Israel Jacobun enabuun, man en tsumabunan, ea shinankanwen.
 En matu dami wani man en tsumabuki.
 Israelbuun, ea jakimakin ea putayamakanwen.
- 22** Eanan, jaska chakabukin man ea ninkaisbuma
 matun chakabu en ma matu pua axunaki,
 nai kuin dunua pua ibaini yamabainmis keska wakinan.
 En ana ma matu mebikinain ea shinain chintundibidankanwen, ea
 anu beidan”, ikaya
- 23** Isaías benimakin yuikin:
 Jehován jawen kushipa matu uinmakin
 Jacobun enabu Israelbu ma ana jatu mebikinanki.
 Naiin, Jehován jatu jaska waiwen taea benimakin kenwankanwen.
 Mai kini keyatapajaidatuun, benimai sai ikanwen.
 Mati tibi inun ni xukua inun dasibi ji mapubaunabuun,
 jawen kushipa uin benima chakayamai kantakanwen.
- 24** Matun mebikinanika Jehován,
 man kaindiamá matun yuda yumewanitun matu yuikin:
 “Eadan, en Jehován dasibi dami wakin
 nai jidabi kesukauana wakin inun mai dikabi taxnimatan en
 mestenwaniki,
 tsuan ea jawa medabewamadan.
- 25** Ja inun, junibudan, en jatube janchamabia jaskaxanai chanimisbun
 janchaibu ninkakin unantan
 jatun shinan en nemamiski.
 Jabu unanepai chanimisbu jatun shinan en jawama wamiski.
 Juni unanepakin yusiaiñbu en jatu jamakidi yuimamiski,
 unanepakin atidububiaken jatun jancha inun jatun shinan jamen
 wankinan.
- 26** Jamen jabun ea chanima chibainbudan,
 jatu jaska wama jatu jancha kayabi yuimakin en jatu
 menemakubainmiski.
 En jatu yunua jabu en janchawen yubakaibudan,
 jawada akaibu pe kainkunkainmiski.
 Jamen eanan, Jerusalén yunukin en pewaidan,
 ana chintunbidan janu ana jiwxexankanikiki.
 Judán maewan tibidan, ana benibaunxankanikiki.

Mae chakabuwaniwu ean en jatu benimakin keyuxanaii.

²⁷ Ianenwan netsukin en taxka watidu inun

jau jene tibi unpax jayayamanun en yunutiduki.

²⁸ Januxun Persia xanen ibujaida Ciro yuikin: ‘Miadan, min en jatu mekexunikaki.

Dasibi jaska en bechipaiai mian min ea axunxanaii’, akin en yunuxanaii.

Ja inun, Jerusalén yuikin: ‘Miadan, min ana mae benikixanaii’, akin en yuixanaii.

Ja inun, Templo yuikin: ‘Min mestenwanti mishki jabun buyabidanxankankiki’, akin en yuidiaxanaii.’

**Persia xanen ibujaida Ciro Jehová jau
dayaxunun yununukaki, na janchadan**

45

¹ Jehován Ciro katukin xanen ibujaida watan

jawen meken yusiudi tsumatan

jau mai pakea betsa betsapa maemakin jawena watan xanen ibu betsa betsapabun detenameti yamawakin jau mebinxanun yununikiaki.

Januxun mae tibitun beputi Ciro Jehován bepenxuntan jau tsuan ana bepuyamanun bun nemaxunkubainikiaki.

Ja jaska wanixun natian Jehován Ciro yuikin:

² “Min kai bebun mia bebun kakin

mati tibi en mia pudexunkubainxanaii.

Mane bronce beputi tibi en mia taskexunkubainxanaii.

Mane hierro xui mestenwanti tibi en mia teke teke axunxanaii.

³ Ea en Jehová Israelbun Diosun min kenawen en mia kenai min ea unanxanun

mabu kadujaida inun pei june adu pejaida wanibu mia bechimatan inankin en mia jaya wakubainxanaii.

⁴ Ja en tsuma Jacob bechipaikin en katuni, Israelbu enabudan, jabuwen taexun min kena kayabiwen en mia kenaniki.

Min xanen ibu keyutima mia shinanpaketia jaya wakin en mia kainmaniki,

jawa min ea unanmabiakenan.

⁵ Edan, en jabilia Jehováki, betsa jayamadan.

Ea keska betsa Dios kayabi jayamajaidaki.

Mai pakea tibibe min jatube detenamexanun en mia kushipa wakin pewaniki, min ea unanmabiakenan,

⁶ badi juaikidia inun badi jikiaikidixun

jau dasibibun tsua ea keska jayama

jau unanxanun bunan.

Eadan, en jibia Jehováki, betsa jayamadan.

⁷ Badi chaxati inun, meshu inun, benimai jiweti inun,
jamapaiwen bika teneti shadabu pawakin en dami waniki.
Na jaska tibi dami wakinan,
ea Jehován anixun en akubainmiski”, iwanan,

Kushipa binu keyua jiwea Jehovákiaki, na janchadan

⁸ Jehován ana yuikin:

“Jamapai tibi en maemati kushipawenan,
nai anuxun ean en yunumiski,
eska keska tibidan,
nai anu basnun kudumayai inun nai kuin anua ui jaya wakinan.
Jabu tibidan, main tsu amis keska wakin
meketi pepa inun yunuti pepa
en kainmamiski, yunu juatan bimimis keska wakinan.

⁹ Mai mabu tibi jaskas jatiubus jatun ashianbe ja itidubumaki.

Ja inun, mapupan ja dayai yuikin: ‘¿Min ea jaska wai?’ ikasmal
jatun ja mabu waxudi yuikin:
‘Mianan, daya min unanmaki’,
akin yuinametidubumaki.

¹⁰ Ja inun, tsuanda juni bake wani
jawen ibubube ja itidumajaidaki,
mai anu jiwemaniwen taeandan.”

¹¹ Jehová Israelin Dios medibi jatun Israel jawena jatu wanitun tsuada
yuikin:

“¿Jaska en bakebu en jatu wamis
man ea unanti watidumen?
¿Jaska jamapai tibi en amis ea medabewakin shinan betsa man ea
yusintidumen?

¹² Ean en aniki, mai inun yudabu dami wakinan.
En mekenwen nai jidabi jatixun kesuntan
januxun en ynuua dasibi jabu chaxatidubu taxni keyunibuki.

¹³ Ja dikabi eandi Ciro en taxnimaniiki,
jau jatu maemanunan.
Jawen kati bai dasibi en jawama waxunxanaii.
Januxun jatun en maewan ea benixunxanikiki.
Jaska watan enabu jabun jatu iyunibu jatu mebikinankin
jatu jenematan jatu ea akin pakamama manakuti yukama ixanikiki”, iki
Jehová dasibi binua janchaxuki.

¹⁴ Jehován Israelbu yuikin:

“Egipto anua dayakapabu inun,
 Etiopía anua mabu inanananmisbu inun,
 Sabá anua ja yuda keyatapabu jabun matu kenwain
 matun tsumai esclavo ixankanikiki.
 Mane dispi chiwetameyawen nexea matu chipi mapua
 matu bebun danti itan kenwankin matu yuikin:
 ‘Chanima kayabi matuna besti Dios kayabi matu anuki.
 Ja bestijaidaki, dios betsa jayamadan’, ikaibun”,

¹⁵ Isaásin ana jatu yuikin:

Jaskabiaibun miadan, tsuan mia uintiduma
 min Israel mekekin piskumanika Dioski.

¹⁶ Tsuabunda dami yushin wamisbudan,
 jabudan, dakexankanikiki.

Betsabu jatuki kaxetan usanxankanikiki.

¹⁷ Jakia Israelbudan, Jehován jatu mekekin
 jatu piskumakin jeneama ixanikiki.
 Jabudan, jawa babui dake taskama ixankanikiki.

¹⁸ Nai dami wanika Dios Jehovánan,
 mai dami wakin taxnimaniki.

Jaska watan mestenwaniki.

Jatun mai dami watanan,
 jau xaka bestiyamanun yudabu dami wadiatan jiwemakin yuikin:
 “Ea besti en Jehováki, betsa jayamadan.

¹⁹ Ea janchaidan, june en isma inun
 janida mai anu junea meshu anua en ismadiki.

Jacobun enabu ean jatu yuikin:
 ‘Janida tsua niama anu ea benakanwen’,
 en jatu aismaki.

Ea en Jehová chanima en janchamisdan, kaneama ikun kayabi en
 yuiaii”, iwanan,

Dami yushin kenwanmisbu Jehován jatu chitenikiaki, na janchadan

²⁰ Jehován ana yuikin:

“Matu jabu texewayamabu janida man jiwebaunabuun,
 dasibi ea anu ichai bekanwen.

Jatida jawa unanbuman jatun ji dami yushin iatan xuku dakabaini
 jabe janchakin jawa jatu meketan piskumatidumabia
 jamen yukai janchawanmisbuki.

²¹ Man jadatuda dami yushinbe janchakin yukakatsi ikaidan,

jaska matu axuntidumenkain,
 betsa tibi meakeakei
 jabe janchakin unanti wakin unankanwen.
 Na jaska tibi inunbadiaidan, bebunkidijaidadan, ¿tsuan yui
 chaninimen?
 ¿Ea besti en ikama inimen, Jehovádan?
 Dios kayabi betsa ea keska jayamaki.
 Dios kushipajaida maemakin mekekin binumanika tsua ea keska
 jayamaki.

²² Mai kesua anu jiwebaunabuun, ea anu bekanwen,
 matu mekekin en matu piskumaxanaidan.
 Eadan, en Dioski, ea keska betsa jayamadan.

²³ Emebi janchai yubakakin
 jawen maemakin binumati en yuimisdan,
 ja en yubakani janchadan, en menexanaii.
 Eskaxankanikiki: Dasibibun ea kenwain ea bebun danti itan,
 ‘Mia besti min Dioski’, ikin ea datan akin
²⁴ ea yuikin: ‘Jehová besti kushipa maemanika paepaki’, ikaibun
 jakia jatidi jabun ea dananmisbu jatuki kaxekin usanxankanikiki.
²⁵ Ewen taea dasibi Israelin enabu jamapai chakabu binu keyutan
 ewen kein benimaxankanikiki”, ikaya,

46 ¹jamén Babilonia anuabun yushin dami Bel,
 jawen kena betsa Baal
 inun Nebo datei saki saki iki main tin imiski.
 Babilonia anuabun jatun yushin dami iyukinan,
 eska wabainmisbuki.
 Jatun inapan mabu bumisbuki jaki jatun yushin dami peumatan
 bumamisbuki.
 Ina ji xankama peumabainabu jin imisbuki.
² Ja yushin dami jawa jatu mekekin paxawatiduma main nidi ika
 mania
 mai pakea betsa anu bukin yushinbiaken tupibaintidubuki.

³ Jehován ana jatu yuikin:
 “Jacobun enabu dasibi man Israelbu jabu matu deteama texe
 wanibuun, ea ninkakanwen.
 Eanan, man kaindiama matun ibube mekexun en matu
 nimakubainmiski.
 En matu ikuxun iyuwawamiski.
⁴ Matu jaska wamisxun jeneama mestebui man buyabis buxka
 juxubiaya

en matu mekediakubainxanaii.

Ean matu dami wanixun jawa matu jeneama en matube
medabemisdan,
eanan, matu tsumakubainkin en matu piskumaxanaii.

⁵ En jiwenidan, ¿en tsua keska man ea shinantidumen?

¿Jadatu ea keska en kushipaya kaintidu man shinain?
Jawa ea keska betsa tsua jayamajaidaki.

⁶ Juni betsabun jatun oro pei inun jatun plata pei ichapa ichawatan
tanakin pisatan

jatun yushin dios wakatsi tsuanda mane mabu wamistun jau dami
waxunun yunutan pakamisbuki,

ja yushin dami bitan ja be bun beti ixun duawakatsidan.

⁷ Ma jatu menexunabu bikin iawanxun janu tsaunti washina anu
tsaunmisbuki,

jaska waimabu anua jawa xekei maetidumadan.

Junibun jui kushipawen jatun yushin dami medabewati jawada yuka
chakayamabiabu

jawa jatu kematiduma inun bika teneaibu jawa jatu
piskumatidumaki.

⁸ Yushin dami kenwain chakabumisbuun, ja yushin damikidi
shinankanwen.

Namakin uian keska wama shinan pejaida wakanwen.

⁹ Matun xenipabu ikubidanibudan, jaskakididi shinankanwen.
Ea besti en Dios kayabiki, betsa jayamadan.

En jabia Dioski, tsua betsa en kushipa keska jayamadan.

¹⁰ En dami wakin taewani keyui kai yui en chaniniki, eadan.

Jaska taxnidiamajaida jaskanunbadiai yui en chaniniki.

Jaska wakatsi ikin yubakatan ean en taxnimamiski.

Jaska tibi jau inunwen, akin ean en yunua imiski.

¹¹ Badi juakidia juni betsa en ma kenaniki.

Chaijaidakea nawa tete keska juxun

jaska en yununi jatun ea axunxanikiki.

Jaska en yubakani en jancha menekin

en jaska yuini dasibi jatun ea axunxanikiki.

¹² Junibu juinti kushibuun, ea ninkakanwen.

Man jaska shinanmabiaken

nawabu anua en matu taxnimamaxanai ana chaijaidamaki.

¹³ Ean en matu taxnimabidanxanaidan,

ma kemaikiki.

Mekekin jawaiidakidan en matu piskumaxanai ma chaimaikiki.

Sión mekeia jaya wakinan, ean en axanaii.
 Jaska watan Israelbu en kushipa en jatu anu butexanaii”, itan.

**Bin ewapa chaka keska nawabu chai jiwebaunabu anu
 Jehován jawen tsuma yunuxanikiaki, na janchadan**

49

¹Jehován tsuma chani:

“Ianenwan kexa anu mae tibi anu jiwebaunabu inun dasibi man chajaida anu jiweabuun, en janchai ea ninkakanwen.

En kaindiama en ewan bake nanti medan en nanea Jehován ea katukin en kena kayabiwen ea kenaniki.

² En jana betsa wakin en jancha nupe chaipa kenujaida keska ea waniki.

Jawen mekenwen mekekin junekin ea aduniki.

Pia kenu dabeya keska ea watan jawen pia aduti kapankan medan ea aduniki.

³ Ea jaska watan Jehován ea yuikin: ‘Israeliin, min en tsumaki. Miwen en kushipa jatu uinmakin en jatu taxnimaxunxanaii’ ”, ikaya

⁴ ea jawen tsumapan shinankin:

“Jamen en daya en benui jawa biamabia dayajaidakin en kushipa en jamen puta bestimaki”, en ibiaya chanima dasibi en akaidan, Diosun tsuma keyuaki. Diosun besti jawen kushipawen ea manakua en uinxanaii.

⁵ Jehová en Dioski.

Jaskawen taexun ea duawaya jawen kushipa janua en bimiski.

En jawen tsuma ikunkainaya Jacobun enabu Israelbun shinan betsa watan

jau janu bei jaki dasixanunbun

Jehován ea yunukatsi katutan en ewan bake nantiki ea dami wakin naneniki, ikaya

⁶ Diosun yuikin:

“Jau Jacobun enabu xukua pakea tibi jabu Israel texenibu jabu besti anu medabewakin ea anu min jatu chintunmaxanun min en tsuma katuxun

en mia yunuama iniki.

Jakra chajaida mai pakea anu jiwediabu
jaska jabudi mekekin piskumakin
min jatu yusinbaunxanun bin ewapa chaxa keska en mia yunudiaii”,
ikaya

⁷ Diosun enabu xukua betsabun jabu jatu ichakajaidawamisbu inun,
xukua betsabun danankin jatu bechipaisbuma inun,
juni puben xanen ibubun jatu achitan jatun tsuma esclavo jatu
wamisbu

Jehová mekenan mebikinanika Israelbun Dios medibitun jawenabu
jatu yuikin:

“Ea Jehová Israelbun Dios medibitun en matu katuni
janchai en yubakamis en matuwen menexanaii.
En matu jaska waxanaiwen taexun
xanen ibubu inun jatun juni bakebu xanen ibubundi
matu uin e itan matu bebunxun kenwain danti ixankanikiki”, itan,

Jerusalén ana jatu benimakatsi Jehová chaninikiaki, na janchadan

⁸ Jehován ana jatu yuikin:

“En yubakaniken taea en duapa matu uinmakatsi ikin en matu
kemaniki.

Ja xabatian matu piskumakatsis ikin en matu medabewaniki.

Matuwen yubakatan mestenwankatsis ikin
matu pe adukin en matu medabewaniki.

Matun mai pakea chakabuwanibu matu ana ibu wamatana
en matu jatu pewamaxundiakatsis ikaii.

⁹ Jabun matu bichinibu keska jatu yuikin:

‘Man ma jatixun bika teneshinaki.

Ana jawama taxnidikanwen.’

Man meshu medan mapua keskabudan,
ana jawaki dateama kainbainxankanwen.

Bai tibiwen bukin piti tibiki man nukuxanaii.

Janu tsua jiweabumanu mati tibi anuadi matun inabu piti
jayaxankanikiki.

¹⁰ Man jawa buniamma inun man unpax manuama inun,
badi chaxajaidakin matu kuama ixanikiki.

Ean matu bechipaikin en matu iyuaiwen taexun matu mekexun
iyuikin

janu chacha tibi unpax jaya anu en matu iyukubainxanaii.

¹¹ Mati matipa anu bai jayamabiaken

matu bai tapinxunkin bai chakabu en matu panpa
waxunkubainxanaii.

¹² ¡Uinkanwen! Chaijaidakea matu medabewanun ika bekanikiki,
nortekidia inun badi jikiaikidia inun mai metujaida Asuán anua
beidan.

¹³ Jehován jawenabu bika teneaibu ana jaska uinkatsi ikama
jatuwen nuikin ma jatu daewaiwen taea
naiin, ¡benimai sai sai ikanwen!
Mati matipaan, ¡benimai sai sai ikanwen!
Maiin, ¡benima paepai shinan chankankanwen!” ikaya

¹⁴ jakia Siónendi yuikin:

“Jehovánan, ea jenebainaki.
En Diosdan, ea jakimaki”, ibiaya

¹⁵ “Min shinanan, ainbu betsanan,
¿jawen bake kayabi bechipaibiakin jakimakin jenetidumen?
Jawen bake kayabibia jakimatiduki.

Jakia eadan, Sióneen, en mia jawa jakima taskatidumaki.

¹⁶ Ean en mekenki netankin akawaxun en mia iyuaii.

Mia kenebaunibudan, jabias keska mikidi en shinan jayaki.

¹⁷ Mia jabun benibaunkatsi shinainbudan, jin jin ikanikiki,
jabun mia chakabuwakatsi shinanibu keskamadan.

Jabun mia chakabuwani budan, ma janida buabuki.

¹⁸ Bewenikitan min mae uinbaunwen,
dasibi ichatan mia anu ana bei jaskabidankanimenkainan.

Ea Jehová en jiweawen ibubis mia akatsi en yubakaii.

Dasibi jabu bexunan, mane inun tadi jawendua mia sawemakin
akawai bekanikiki,

ainbu beneyakatsi daumis keska mia wakinan.

¹⁹ Min mae dasibi pude pude akin yamawakin chakabuwani bu mania
anudan,

natianan, min mae ana jatiuidama pexeishta anu
yuda jiwebauni dama ixanikiki.

Jaska inun, jabun matu yamawanibudan, ma nenuma buyamabuki.

²⁰ Matun bakebu chai iyunibu ibooma janchaibu man ninkaxanaii,
eskaibudan:

‘Na nukun maedan, jaskaida pexeishta daka.

Nun janu jiwenun janu jiweti mae ewapa nuku axunwen’, ikaibun

²¹ matun juinti medan janchai:

‘Tsuau jatida bake ea waxunimen?

Jaskatan bakeyakin en bake bitidumaki.
 Ewen jiwenibudan, jatu chai iyukin ma ea jatu jenemabainibuki.
 Ja bakebudan, ¿tsuan jatu yumewaimamen?
 Ea besti wakin jenebainibuki.
 Na bakebudan, ¿jadakidia beshianbumen?” ikaya

²² Jehován yuikin:

“Jau min juni bakebu jau puntsaumetan iwekin
 min ainbu bakebu jau iatan mia anu iwenunbun
 nawabu xukuabu en jatu yunuxanaii,
 mae tibi en unanmati jatu uinmakinan.

²³ Jabu xanen ibujaidanibu betsaidan,

jabu inun jatun ain matundi man jatu tsuma waxanaii.
 Matu dayaxunkin matun bakebu matu mekexunxankanikiki.
 Ja inun, jatun ainbu bakebun matun bakebu matu chuchu
 amaxunxankanikiki.

Matu bebun main beti ika dakaxun jabun matu kenwankin
 jatun janawen matun tae taxuxankanikiki.

Matu jaska waibu uinkin chanima en matun Jehová man eki chiti imis
 man ana jawa eki dakeama ixanai man unanxanaii.

²⁴ Detenamenika unaintun detenamekin jawen jawada bishianan,
 ¿tsuan mebintidumen?

Juni pubenen tsuada achitan kene medan bichishinadan,
 ¿jaskatan kainkaintidumen?” iwanan,

²⁵ Jehován mestenwankin yuiadan:

“Ja detenamenika kushipatun jawada juni betsana bishian
 chanima ana mebinxuntiduki.

Ja inun, juni pubenen jawen jawada bianbiashinken
 chanima mebintiduki.

Jabu matuki sinatai ja ikaibu ea en matu janchaxunxanaii.
 Ean kayabis matun bakebu en matu piskumaxunxanaii.

²⁶ Jabun matu yunu yunu akin bika tenemamisbudan,
 ibubis jatunabubetandi bika tenexankanikiki,
 jatun nami ibubis piai keska wakinan.

Ipubis jatun jimiwen paenxankanikiki, vinowen paean keskaidan.
 Jaskaibun ja dasibi yuda jiwebaunabun
 ea en Jehová matun mekenan piskumanika inun
 ea en Jacobun kushipajaida inun ea en matun mebikinanika
 jabun ea unanxankanikiki”, itan,

50 ¹ Jehován jatu yuikubainkin:
 “Juni betsa jawen jawada biankin

en dibiamawen taexun
 pakakin jau matu jawen tsuma wakin
 esclavo wanun en matu yunuama iniki.
 Ja inun, juni betsan jawen ain ana bechipaiama
 danankin jenemis keska wakin
 Israel matun ibubu en jawa jatu danankin nichianmabia
 jakia ibubis chakabukin
 en jancha ninkaisbumawen taexun
 matun ibubu Israelbu danankin
 en jatu yununiki,
 jau nawabun jatu tsuma wayununbunan.

- ² Ana matu medabewanun ika juxun
 en jawa juni betsya bechiamma iniki.
 En matu kenabia tsuan taska man ea kemama inibuki.
 En matu jaska wabia ¿jaskakin man ea benakin shinainsmamen?
 Eanan, matu medabewakin en matu piskumatiduma
 ¿man ekidi shinain imismen?
 Jabun matu tsuma wabu anua en matu taxnimatiduma dabanen
 ¿man shinain imismen?
 Eadan, en kushipaki. Ianenwan yunukin:
 'Jawaida jene netsui metuwe',
 en wa itidu inun
 jenedi betsya wakin metu wakin en tsusin wanyan
 baka unpax manui mawai pisimayatiduki, jene jayamakenan.
 Ja jene netsua anudi maidi janu tsua jiweabuma en watiduki.
³ Nai kaxai keska wakin meshu wakin en
 bepua tsuada mawashinken jatu manui punu nukamisbu keska en
 wamiski."

**Jehován tsuma Dioski chiti itan jawa dateama
 ichakawabiabu tenekubainxanikiaki, na janchadan**

- ⁴ Jabu nuitapai punu nukabu ea Isaíasin en jatu medabewakin
 benimawaxanun
 Jehován ea unanepa watan ea yununiki.
 En xabakabi pe ninkakubainun medabewakin
 xaba tibi Diosun ea pe yusinkubainmiski.
⁵ Jehován tapinmakin ea unanepa waya
 jawa danain jaki pechi
 en jawen juinti kushismaki.
⁶ Jau ea kakush kakush anunbun
 en pechi en jatu inankin yunumiski.
 En kexni ea tseka tseka akaibu

en jawa jatu nemaismaki.

Jabun ea ichakawakin eki kemu michuaibun
en besu junei en jawa tininsmaki.

⁷ Jehován ea medabewamiswen taea
tsuabunda ea ichakawakin ea isin tenemaya
datei chintuanma tenea en mishki kushipa keskaki.
En xanen ibu kushipatun ea mekeaya
jabatiandi eki kaxebiaibun jawa datei
en jawa dakeama ixanaii.

⁸ Jatun ea mekemistun ea kexeken
tsuada eki sinatai juayadan,
jatun unanti wakin pewanikatun
jau nuku pewanun janu bunankanwen.
Tsuanda en chakabukidi ea chitekatsis ikidan,
juxun jau ea yui benunbunwen.

⁹ Jehová Dios kushipatun ea medabewamiswen taexun
tsuan ea chitetan ea jawa ichakawatidubumaki.
Dasibi jabu eki sinatamisbudan, yamaxankaniiki,
ja nakaxan tadi pikin keyumis keskaidan.

Jerusalén ichakawakubainaibu Jehová
mebikinankatsi chaninikiaki, na janchadan

52

¹ Jehován yuikin:

“Síoneen, ¡bestendiwe!

¡Bestentan pei kushipadiwe!
Maewan Jerusalén medibituun,
jabun Dios ikunwanbuma juni chakabu
ana mia anu chintunbidan jikiama ixanaibuwen taea
min tadi jawenduajaida sawediwe.

² Jerusaléen, ¡beni kushipadiwe!

Min tadi anua mai kudu tatan
xanen ibun tsauti anu tsaudiwe.

Sión chipash mia tsuma wanibuun,
¡mane dispi chiwetameyawen mia tenexnibu tepekedie!” atan

³ ana Jehován jatu yuikin:

“Matu esclavo tsuma wakubainkin jawa pei jexeishta matuwen
taexun en biama iniki.

Janua natian ean matu pekakinan,
jabudi en jawa pei jexeishta en jatu inanmadi inanxanaii.

⁴ Ja dukun enabu bui taeidan,

Egipto anu dukun jadi nawa keskai jiwenibuki.

- Janua betsadan, jabun jawa chakabu jatu wamabia eiskaun
Asiria nawabun jatu ichakawakin bika ea jatu tenenmanibuki.
- ⁵ Natianan, ¿jatu jaska waibu jawa jatukidi en uiain?
Enabun jawa jatu wamabia Babilonia anu jatu iyunixun
jatu ichakawai jatuki kaxeí kein janis Diosunabu daka
jatu wai eki sinatai janchai jeneabumaki.
- ⁶ Jatianda enabu medabewai en ana juaya
jabun ea unanxankanikiki,
jaska ea Jehová en janchani jatu anua en taxnimayadan”, ikaya
- ⁷ tsuada mati matipa anu jukin chakabumakidankin
kakape yuinun ika jui benimakidanai uiainbun
Dios anua pepa unanuma jiweti chani inun
jaska chakabu anua taxnitidubu chanitan Sión yuikin:
“Min Diosdan, ¡xanen ibujaidaki!” axanikiki.
- ⁸ Jehová ana Sión anu chintunkidani juai mae mekenikabun ibubis
uintan benimakin
jawenabu unanmai jui kushipawen jatu sai ixuainbu
¡ninkaxankanwen!
- ⁹ Jehová jawenabuwen nuikin jatu maemaxun matu daewakin
man Jerusalén matu pudenibu maniadán,
ma matuki sinataibu jatu nichintan matu taxnimaiwen taexun
kenwain jatube sai sai ikin jatu kemakanwen.
- ¹⁰ Jehován jawen kushipa jatu uinmaxanikiki,
dasibi mai pakea nawa xukua tibi anu manibaunxun uiainbunan.
Dasibi mai jidabi anuxun ma nukun Diosun nuku mekekin piskuma
ninkakin unanxankanikiki.
- ¹¹ ¡Menan Babilonia anua taxnidikanwen!
ana jawa atimapa meama taxnitan kainkainidan.
Man jabun Dios kenwanti jiwe mabu buxanaibudan,
ana chakabuwama pe mekei xunpindikanwen.
- ¹² Jabu man kainbainxanaibudan,
Jehová Israelbun Diosun matu kexeakeakebainaiwen taea kaidan,
jin jin iki jawaida kainbainama inun junebaini
paxayamaxankanwen.
- Jehován tsumapanan, bika betsa betsapa
maemaxanikiaki, na janchadan**
- ¹³ Jehován ana jatu yuikin:
“En tsumapan dasibi binukin keyuaya
xanen ibujaida wakin dasibi jatu binumatan en tsaunxanaii.
- ¹⁴ Yudabun jaska tenetidumajaida wakin jawen yuda atimapa wakin

ana juni kuin keskama waxanaiwen taea e iki jawen
datexankanikiki.

¹⁵ Jaska uatian nawa xukuabu tibi inun jatun xanen ibubun jawa
uinsbuma
na jabiatian uinkin ninkai jakidi tapinkin jawa jancha yuitiduma e
iki jawen datexankanikiki”, ikaya,

53 ¹jaska nun ninkaidan,
²tsuan ikunwantidumen?

Jehován jawen kushipadan,
¿tsua xabakabi ma uinmaimamen?

² Mai tsusinjaida anu miban tacha uke medanjaida ka
jawen pei benei pekaunmis keskai
Jehován jawen tsuma yumeai uinkatsis ikikiki.
Jawen yudadan, jawa jawenduakin jatu jawen kemumakin
bechipaimatiduma ixanikiki.

³ Yudabun jakidi chakabu shinankin dananxankanikiki,
ja junin isin betsap mekin beyawai nuitapaidan.
Tsua dabanen jawa unanma uinsma akawakin nukubun nun
dananxanaii.

⁴ Nun jaska wabiaya jatun nukun chakabu bukin
nukun chakabu nuku tenexunxanikiki.
Nukun chakabu nun jawen isin teneai bitan nuku mexunxanikiki.
Nukun nun uiainan, Diosun detekin ichakawai dakeai nun shinaiin.

⁵ Nun atimapai chakabumiswen taexun
ja juni nukuwen taexun chachikin pishpe axankanikiki.
Nukun chakabuwen taea
ja chakabumis keskakin nuku tenexunxanikiki.
Ja ichakawabu nuitapabiakinan,
unanuma jiweti nuku kainmaxunxanikiki.
Ja yumanwankin deteabuwen taeidan,
nukun yudadan, isin jayamai kayaxanikiki.

⁶ Dasibi nukubudan,
nun jamakidi baiwen buxankanaii,
chaxuwan tibi jawen baiwen buama benumis keskaidan.
Nun jaskabiyaya Jehován dasibi nukun chakabu bitan
jawen tsuma nuku peumaxunxanikiki.

⁷ Jabun achitan ichakawabiabu jawa jatu nemama inun
jawa jancha betsap yui taskama ixanikiki.
Jabun chaxuwan detemisbun chaxuwan bake detekatsi buabu
“maan, maan” isma keskai jawa yuiama ixanikiki,
chaxuwan jawen dari mextekatsi bichimis keska wabiabudan.

- 8 Jawama nibiaken chaniwen taexun ja juni bichiaibun
 ja juni tsuan nemakananxunama inun
 janu iyuabu tsua jawen nuiama ixanikiki.
 Na mai anua ja juni betsekin akawakinan, atimas tenankin
 enabun chakabuwen taexun kupixankanikiki.
- 9 Juni chakabu mawa jatu maiwamisbu anu
 jabu dapi maiwaxankanikiki.
 Jawa kanei chakabuisma inun jawa chanichakai janchaismabiaken
 ja juni chakabubube maiwaxankanikiki.
- 10 Jehován jawen tsuma bika betsapa jawena wamaxanikiki.
 Nukun chakabuwen taexun jawen jiwea yaushlama inanxanaiwen
 taea
 jiwea chaipa bitan bababu midima uin jatuki nukuxanikiki.
 Jehován jaska bechipai yubakani
 jawen tsumawen taexun jaska tibi menexanikiki.
- 11 Juinti xuduxun bika tenekubainkin
 atimas maematan bestentan xaba uin jawen benimai shinan
 chankanxanikiki.
 Yuda ichapabun chakabu madiastun jatu tenexunkin
 Jehován tsuma kaneismatun jatun kupiti bixunkin jatu
 putamaxanikiki.
- 12 Jawen tsuma pepa jawen jiwea jawa yaushlama mawaxanaiwen
 taexun
 Diosun duawakin jawen tsuma kushipa betsabube manakukin
 ja jawen tsuma duajaidawaxanikiki.
 Juni chakabu keska wakin chitebiaibun
 yudabun chakabu ichapa buaxunkin
 jabun chakabuwamisbu jatu ea axunxanaiwen taexun
 pepa bestiwen Diosun manakuxanikiki.

**Israelbu Diosunabu jawen ain keska jatuwen
 nuikin jenetidumakiaki, na janchadan**

54 ¹Jehová Diosun matu yuikin:
 “Ainbu tsuanda jenebiabainitun
 ja ainbu betsya beneyabiaken
 ja ainbu jawen benen jenebainyamatun
 bake ichapa bikin min jatu binunxanaii.
 Min jaskawen taea ainbu bake bitiduma inun
 min jawa bake kain isin meismaan,
 min bakeumabiadan, benimai shinan chankain sai sai iki
 kanta chakayamadiwe”, mia waikiki.

- ² Min tadi jiwe min janu jiwea ana janxekakin jaxpa ewapa wadiwe,
jawa dateama ana puntebaunkin
jawen dispi chaipa waxun mestenwankin
jawen nichinti tibiki masta akeakewe,
- ³ chipu yusiudi inun yusmaudi minabu pai manibaunkin
nawa xukua ichapa jatu achitan
natian ja mae janu tsua jiweabuma anu
jabun maewatan jiwexanaibuwen taeidan.
- ⁴ Miki jawa kaxekin mia usanma ixanaibuwen taea
jawa dateyamaxanwen.
Miki sinatama ixanaibuwen taea dakeyamaxanwen.
Min chipash yumechakai chakabuni jawen dakemisdan, jakimawe.
Mia ichakawakin min benen jenebainkin mia dakewanidan,
ana jas shinanyamawe.
- ⁵ Mia jatun dami wanitun natian ana miki nukukin ainwankin
akawatan
mia jaska duawakin dasibi min jiwea betsajaida waxanikiki,
jawen kena Dasibi Kushipa Binujaida Jehovánan.
Min mebikinanika Israelin Dios medibi
ja dasibi mai jidabi dami wani Diosunan, mia jaska waxanikiki.
- ⁶ Matu man Israel ainbu chipash jenebainibu man bika teneai keskaki.
Jakia matun Diosunan, ana matukidi shinan betsai petan matu
kenakin yuikin:
- ⁷ “En matu jeneyubainxanaii, jatixunda kamadan.
Jakia en nui pae ewapawen ana chintunkidan
matuki nukui en matube ketaxameyuxanaii.
- ⁸ Jawaida matuki sinatakuan matuki dakei
matu anua en idubiaima
jakia en nui ikibi ini ja en nuimis en ana matu uinmaxanaii”,
ikikiki, matun mebikinanika Jehová janchai chanidan.
- ⁹ “Jaska inun, Noé jiweatian jene ewawatan
mai jidabi achi keyushinxun chipu Noé yubakin:
‘En ana jene ewawakin mai achi keyuama ixanaii’,
ika en yubakani keska
natian jabiaskadi en yubakadiaii:
‘En ana miki sinatama ixanaii.
Ja inun, en ana pubenkin mia date date akama ixanaii.
- ¹⁰ Mati matipa ibubis maebiai inun
mawa matekei nidi ibiaya
jakia en nui ikibi ika miwen taeidan,

jawa betsai maetiduma inun
 en yubakani jawen unanuma jiwemati
 jawa betsai wakin en maewatidumadiki' ", iki
 Jehová miwen nui janchaikiki.

Jerusalén bena wakin betsajaida waxanikiaki, na janchadan

- ¹¹ "Mae danankin mia ichakawakin nuitapawanixun
 tsuan mia daewai miwen nuisbumabiaken,
 ean min mishki bemaki mia jawendua wakin
 bui nanke deken ji ji ikaiwen en mia bepxukanaii.
 Mishki jawen mestenwanti zafiro nanke chaxakapawen en mia
 mabuyaxanaii.
- ¹² Min jiwe keyatapa januxun uinbaunti rubí tashi jushinipawen en
 dapuxkanaii.
 Jawen beputi berilo tashi kudupawen en bepxukanaii.
 Nenkati kadujaidawen dasibi min mae jidabi en mia kenebaunxanaii.
- ¹³ Januxun eanan, min bakebu dasibi en tapinmaxanaii.
 Jabu dasibidan, benimai jawenduai unanuma jiwexankanikiki.
- ¹⁴ En yunuti pepa kushipatun mia mestenwan
 ana mia ichakawakin tsuma wama inun
 min ana jawaki dateama ixanaii.
 Min date paepamis ana chintunkidan mia achiama ixanikiki.
- ¹⁵ Tsuanda mia ana detenun ikaidan,
 jaskaibudan, ean en ana mia jatu yunuamaki.
 Jakia tsuanda mia detenun ikaibudan,
 mian ibubis min jatu maemaxanaii.
- ¹⁶ Jabun mane mabu wakin jabun xun xun akin
 jawen detenameti mabu betsapa wamisbudan,
 ean en jatu dami watan kainmamiski.
 Junibu jabun jatu tenankin jau jatu yamawakin nishma wanunbun
 ean en jatu dami watan kainmadiamiski.
- ¹⁷ Jakia miadan, piawen mia yamawatidubu jawa jayamaki.
 Jabun mikidi jawada yuikin chiteaibu jamenki.
 Na en jancha en matu inainan, tsuabunda ea ikunwankin chibainbu
 ean en matu binumakin maemama ewen taexun matun pepa man bixanaii",
 iki Jehová janchakin mestenwainkiki.

**Yuda dasibibu jawen duapa Jehován jatu uinmakatsi
 jatu yubanikiaki, na janchadan**

Tsuabuda man pei jayamabia bekanwen,
jawa pakama xekiwan trigo inun,
uva vino inun, awa chuchu bi beidan.

² ¿Jaskai man jamen pei inanananmismen,
pitimabiaken jamen putakinan?

¿Jaskakin matun daya pei man jatu inanmismen,
jawa matu medabewakin shinan chankanwatidumabiakenan?
Ea ninka pewakubainkin man piti pepa pixanaii,
jawada piti kemutapa man bechipaiai pikinan.

³ Eki kemai ea anu bexun ea ninkakanwen.

Ea ninkajaidakubaini man jiwxenaii.

David bechipaikin yubanixun amakin en menexuni keska wakin
matube yubakatan jenepaketima en matubedi yubakatsis ikaii.

⁴ En jaibu David ekidi chanikaunti ean en nawabu unanti wamaniki,
xanen ibukin jau jabu ekidi tapinmaxanunan.

⁵ Nawabun matu unanbuma man jatu kenaya
jabun matu unanmabia ninkanun ika matu anu

kushibidanxankankikiki,

ea Jehová Israelin Dios medibitun

en kushipawen en matu duawaiwen taeandan”, ikai ninkatan

⁶ Isaíasin jatu yuikin:

“Man Jehováki nukukatsis ikaidan, menan kenadikanwen,
na jibia chaima matu dapi nia man jaki nukutidukidan.

⁷ Juni chakabubun jau jatun jiwea chakabu inun
jatun shinan chakabu jenetan jau Jehová anu benunbunwen.

Man jaskaibuwen taea Jehová matuwen nuixanikiki.

Matun chakabu jenetan Dios anu chintundibidankanwen.

Jadan, matuwen dabanan ikin matun chakabu matu buaxunxanikiki.”

⁸⁻⁹ Jehován ana jatu yuikin:

“En shinanan, matun man shinanmis keskamaki.

En jaska amisdan, matun man amis keskamadiki.

Nai keyatapa nenumajaidatun mai binua keska

en shinanmis inun jaska en amistunan, matun shinan en binuaki”,
ikin

Jehován jawen jancha chanima mestenwaniki.

¹⁰ Ana yuikin:

“Ui inun matsu tanki nai anua mai anu bututan ana jawendi
chintuanma

mai mecha wakin pepa wa yunu banabu jukunmakin pexamamiski.
Janua jawen jexe ewatan kaniai ja bimi tsekatan misi watan
pimisbuki.

¹¹ Jabiaska keskadiai en janchawen en jatu jancha wa
jawa wadiama ea anu jamen ana chintuntidumaki.
Jakia jaska en uinkin bechipaiai keska en jatu yunua
jabun akin menemisbuki.

¹² Nenu Babilonia anu man Israelbu benibu
ana matun mae anu chintunbaini benimabaini bui
matun mai pakea anu unanuma man jikixankanaii.
Man jaskabainaibu matu uintan
mati matipa inun mawa tibi matuwen benimai kantaibun
ni xukuabun matu uintan matuwendi benimakin
mekен paux paux akai keskai bubi bubi ixankanikiki.

¹³ Janu ana muxa beneama jawen xantukun ji pino benexanikiki.
Ana nishi muxaya beneama nishi jua pepaya benei mai
bewexekexanikiki.
Jaska tibi kain beneai ea Jehován unanmati uinkin
en kena kushipa jawa tsuan yamawatiduma ikibi ika
uinxankanikiki”, iniki.

Samake kayabikin uinmaidan, eskatikiaki, na janchadan

58

¹ Jehován ana ea yuikin:

“Dateama sai ichakayamatianwen,
mimawati trompeta chan akai keska wakin min jui kainmakinan.
Enabun kanekin chakabuwamisbu ja akin
Jacobun enabu jatun chakabu jatu chitekin ja atanwen.

² En jiwea bai unain benima bestinun ixun xaba tibi man ea
benakubainaii,

mae pepawen jiwea ikasi pepai inun
en yunuti jancha chakabuwama kaneama ikasdiidan.
En yunuti kushipa pepa ea yukatan ea bepadankin
ea uinmai benimabidani ea anu bemisbuki.

³ Jaskabiai matu yuinamei:

‘¿Jaskai jamen nun samakemismen,
Diosun nuku uianmabiakenan?
¿Jaskai jamen ibubis nun bika teneai,
Diosun nuku tanamabiakenan?’ iki man jaska janchamiski.
Ja xabatian samaketi en medibi wabianiken
janu ea samakexunama ja xabatian mabu inananankin
matun dayakapabu ichakawakin man jatu yunuchakayamamiski.

⁴ Ja xabatian samakeidan, man eskamiski,
ja iki kunyan ikidan, detenameidan,

pubenkin matun mekenen jatu kushakinan.

Ja xabatian samakei man jaskamiswen taexun

ebe janchakin man ea yukaibu en matu jawa ninkaimaki.

⁵ Matun man shinanan, man samakeiwen ea benimawaidan, eska dakati dabanan man ikai, bika teneidan, matun buxka tinian daka tawa puaka keska dakadan, tadi bexa xeni sawetan mapu mapu tukutan dakadan, ‘Jaska dakaxun Jehová en benimawaiii’, ikin man yuimiski, samakekinan.

⁶ ¡Jaskatimajaidaki!

Samakea kayabi ean en bechipaiaidan, eska tibi shinain itiki. Ninkaidakanwen.

Mane dispi chiwetameya nasa keska wakin yunuti chakabu pekanwen.

Jatu bika tenemakin man juni betsa nexakin akawadan, ana jatu bika tenemama jenekanwen.

Jatu ichakawaibu medabewakin jatu mepanmakanwen.

Tsuanda jatu yunuchakai man pubenmisdan, yamai bextekedikanwen.

⁷ Tsuabuda bunaibu matun piti paxkaxun jatu pimakanwen.

Nuitapai jiweuma mapuabu matun jiwetan jatu ixun jatu uxankanwen.

Tsuada tadiuma matun tadi betsa jatu sawemakanwen.

Minabu kayabi jatu medabewakin jeneyamakubainkanwen.

⁸ Man jaska wakin samakekin ea uinmakubainaibudan, matun akadan, penai xaba chaxamis keska en matu waxanaii. Jamapai bika man teneai jawaida man xuxaxanaii, dete bui kesaidan.

Kaneama man pepa wamisdan, mia bebun taxniaya en kushipa pepawen matu mekexun en matu unanmakubainxanaii.

⁹ Januxun ebe janchakin man ea kenaya ninkatan en matu kemaxanaii.

Jawada mei datei bis ikin man ea jawaida yukaya ean matu kemakin:

‘En nenuki’, en matu axanaii.

Jawada atimapan matu tsuma man yamawakin keyuai inun, juni betsa man ana jatu ichama inun, metukin man ana jatu yuanma inun,

¹⁰ bunaiba mian kayabis man jatu medabewakin pimai inun, jawada bika teneaibu man jatu medabewamisdan, jaskai man pe jiwea meshu medan bin chaxa keska matu uinxankanikiki.

Kanei man chakabubiashinken tsuan ana jaska shinanma
badi manananbi badi pexeas keska pe besti matu uinxankanikiki.

¹¹ Man jaskakenan, eadan, matube ketaxamea matu mekekubainkin
janu buniaibutian man pinunbun janu tsua jiweabuma anu piti
jamen ikai en matu waxunxanaii.

Matun yuda babuaya en matu ana kushipa waxanaii.

Man miban bana matu nashima keska wakin en matu duawaxanaii,
chacha unpax jawa jene netsutima keska wakinan.

¹² Matunabun mae tekekin di anibu nawasantan ana benixankanikiki.
Ja mishki matun xenipabun anibu nenumajaidadan,
ja mishki tsamabaunibu ana matu pewaxunxankanikiki.
Ja matun mae ana pewakin ma jaska waibun
matunabu jatu kenakin: ‘Mae xeni pewakin kenebaunibu beninikabu
inun
jiwe tekekin di anibu ana benibaunikabuki’, jatu waxankanikiki”,
itan,

Sábado juindukuntidan, medibikiaki, na janchadan

¹³ Jehován ana jatu yuikin:

“En juindukunti wani sábadotianan, jaki mesekubainkanwen.

Ja xaba medibi en wanidan, enaki.

Jaskawen taea ja xaba medibitian janu matun daya tibi
janu man ana jawa metidubumajaidaki.

Janu juindukunti xaba en wanidan, benimati xabaki.

Ja xaba medibitianan, ea en Jehová man ea jabi duawai keskaki.

Ja sábadotian matun jawada daya shinanma inun,
matun mabu inananain shinanma ea benakin ea
duawabestikubainkanwen.

¹⁴ Man jaskakubainaibudan,

ea anua matun benima pae man bikubainxanaii.

Matuki sinataibu en kushipawen matu maemamatian matun mae anu
ana iyuxun

en matu xanen ibu waxanaii.

Matun xenipabu Jacob en yubani keska matubu en matu inanxanaii,
man jawen benimaxanunbunan”, ikin

Jehová kayabitun jawen jancha jaska mestenwankin yuikiki.

Jehován Jerusalén ana bena wakin jawendua waxanikiaki, na janchadan

60

¹ “Jerusalén anuabuun, benimai benidikanwen.

Jehován ana matu medabewai taxnitan

jawen kushipa bin keska matu anu achimakin
ma matu anu chaxa waikiki.

² Yamepanan, mai bepuaki.

Meshu ten ikaitunan, nawa xukuabu achiaki.

Jakia Jehovánan, jawen chaxa matu anu pexakin
jawen kushipa matu uinmaiwen taea

³ ja uintan nawa xukuabu tibi matun mekenan uin bexankanikiki.

Xanen ibujaidabun matun kushipa penai keska uinun ika
matu anu bexankanikiki.

⁴ Bewenikitan matu dapi uinbaunkanwen.

Uinkanwen, dasibi jaska tibi ichatan matu anu bexankanikikidan.
Matun juni bakebu chajaida jiweabu bexankanikiki.

Matun ainbu bake mishtinbu jatu puntsaumexun
jatu iwexankanikiki.

⁵ Matun bakebu beaibu man uiyanan benima paen matu achia
man juinti shinan chankan paepaxanaii.

Maewan ianenwan kexa anu jiwexun mabu pepa ichawaimaxun
bexun matu inanxankanikiki.

⁶ Madián nawabu anua inun Efá nawabu anua

camello bei chichikinanbidankin mabu peutan beaibu man uinxanaii.
Ja inun, Sabá mai pakea anuxundi camello midimaki
oro inun ininti pepa peumatan bemaxankanikiki.

Jabu bekinan, Jehován kushipa kenwankin yuibidanxankanikiki.

⁷ Dasibi Quedarin enabun chaxuwan xukua matuna ixanikiki.

Nebaiotin enabun chaxuwan bene tibidan, matuna idiaxanikiki.
Jadatuda bitan ea Jehován chi tapukixun man ea menuxunkin
ja inankuinwen man ea benimawatidubuki.

Man ea jaska waxunaya en Templo ana jawenduajaida wakin
en matu uinmaxanaii.

⁸ ¿Tsuabumen, ja nai kuin keska nuyabaunaibu inun
deiwan jatun xui anu jikiae keskaibudan?

⁹ Jabudan, xaxuwan tibi ichatan beaibu

maewan Tarsis anua xaxuwan betsa betsapadi bebukidankin
matun bakebu chaikea matu iwexunkin
jatun oro inun jatun plata jatu bemaxankanikiki,
ea Jehová Israelin Dios medibitun en matu kushipajaida wai
ea duawanun, ika beidan.

¹⁰ Matunabuma nawa betsabun matun mae kene
ana benibaunxankanikiki.

Ja jabu xanen ibujaidamisbun matu dayaxunkin matu
duawaxankanikiki.

- Ea Jehová matuki sinatakin en matu kupibiani
natian en duapawen ana en matuwen nuixanaii.
- ¹¹ Matun mae beputidan, bepemanasa ixanikiki,
ana badidi inun meshu medan bepuamadan,
ja nawa xukua xanen ibujaida tibibun
jatun mabu pepa matu janu jikibidankin
jau bebidan bebidanxanunbunan.
- ¹² Mai pakea betsan jabun matu bechipaisma
jabu yamai ana jayama ixanikiki”, iwanan,
- ¹³ Jehován ana Jerusalén yuikin:
“Ja ji jawendua tibi pino inun, abeto inun, ciprés
Líbano mati matipa anua matu anu bexankanikiki,
en Templo ana jawendua wakin
janu en tae en janaxanai anu ea bechipaimati wakinan.
- ¹⁴ Jabun matu ichakawapaunibun bakebudan,
matuki mesei matu bebun beti iki bexankanikiki.
Jabun matu dananjaidabiapaunibu matun tae naman danti ixun
yuikin: ‘Man Jehován maewanki.
Siónan, Israelin Dios medibitun maewanki’,
akin matu kenaxankanikiki.
- ¹⁵ Ana tsuan matu jenebainama inun danankin
matu besti xununbainama ixanikiki.
Jakia ean matu jawendua wakin en matu ikibi imaxanaii,
janua benimai jenepaketima matu wakinan.
- ¹⁶ Nawa xukua tibibun jatun piti pepajaida bexun matu
inanxankanikiki.
Nawa xanen ibubun jatun mabu jawendua kadujaida
matu bexunxankanikiki.
Matu jaska waibu uinkin ea Jehová en matun piskumanika man
unanxanaii,
Jacobun medabenanika kushipajaida eadan, en matun
mebikinanikadan.
- ¹⁷ Man jaskawen jiwenun en matu pewaxunxanaii.
Ana mane bronce matu inanma jawen xantukun mane oro kadujaida
en matu inanxanaii.
Ana mane kushipa hierro matu inanma
jawen xantukun mane kadu plata en matu inanxanaii.
Ana ji bexa matu inanma jawen xantukun bronce en matu inanxanaii.
Ana mishki matu inanma jawen xantukun hierro mane kushipa en
matu inanxanaii.

Eanan, ja unanuma jawama jiwetiwen en matu xanen ibumaxanaii,
yunuti padananainsmawen matu yunumakinan.

18 Matun mai pakea Israel anua itimaskai detenamebaunaibu
man ana ninka taskama ixanaii.

Jabianudi matun mae ana yamawama inun jiwe di akama
ixankanikiki.

Jakia matun maewan kenekauana kenakinan:

‘Janu Mekea Kayabi Pepaki’, akin
jawen beputidan, ‘Benimakin Kenwantiki’, axankanikiki.

19 Ja jaskaitian ea en matun Jehová en chaxa ikibi ixanaiwen taea
ana jawa badi chaxai inun uxe meshu medan chaxa jayamabiaken
man manuama ixanaii.

20 Ea en matun Jehová en chaxa ikibi ixanaiwen taea
matun badi jawa nuka taskama inun
matun uxe jawen chaxa keyui nukama ixanikiki.
Jawada bika betsaa betsapa man tenekubainmis
jaskaitian keyuxankanikiki.

21 Dasibi matunabudan, juni duapa pepabu besti ixankanikiki.
Matun mai pakea man ana bixanaidan, matuna inunbadikiki.
Miban mextetan ean en matu banani keska
jawen kataku jukunmis keska man ixanaii.
En kushipa uintan jau ea duawaxanunbun
en mekenen en dayamis keska
en matu pepa wamis uinxankanikiki.

22 Man yuda ichapama xuku pishtabia paidan,
1,000ti tibi matu tanaxankanikiki.
Man ichapama pishtabia man maewan tsekaxanaii.
Jaska en yubanidan, ea Jehován akatsi en chanini ixanikiki,
janu jatianda taxniaitian jawaida ikidan, jaskaxanikiki”, inikiaki.

**Israelbu jatu mekekin piskumakatsi jatuki
Jehová chaninikiaki, na janchadan**

61 ¹Jaskaya Jehován ea katukin xeniwen ea mauka keska wakin
jawen Yushin kushipa ea jikimatan ea yunukin:

“Nuitapaibu jatu shinan chankanwain
kaka pepa jatuki chanitanwen.

Bika teneaibu jatu medabewatanwen.

Jatu nanta iyukin tsuma wabainibu keska inun jatu bichinibu keska
jaska wakin en jatu unanuma jiwematidu jatuki chanitanwen,
jaska wakin en jatu pekatidudan.

- ² Ea en Jehová ja baditian en jatuwen nuikin
en jatu medabewaxanai jatuki chanitanwen.
Ja xabatianan, nukun Dios ja nukuki sinatamisbu
nuku jatu kupixunxanikiki, iki jatuki chanidan.
Dasibi punu nukabu jatu medabewakin
ea jatu daewaxuntanwen.
- ³ Sión anu bika tenei jiweabudan,
ana chi mapu jatu mapu tukumama
maiti jawendua inankin jatu sawematanwen.
Nui kaxachakayamisbu jatu nese watan
benimati xeni ininipa jatu inantanwen.
Tsuabuda jawawen jaskatima medabewakin benimawakin
kantati shinan chankanti jatu yusintanwen.
Min jatu jaska wa yudabun jatu kenakin:
'Ja ji kushipa tekeisma Jehován bananixun jawen kushipa jatu
unanmati jiki', akin jatu kenaxankanikiki.
- ⁴ Jiwe tibi di ini xeni ana benixankanikiki,
matun xenipabun jiwe chakabuwani bu pewakinan,
ja maewan tibi ana nawasantan pewatan man jiwebaunxankananaii.
- ⁵ Nawa betsabu matunabuman matun chaxuwan xukua inun,
matun bai inun, matun uva bai
jabun matu dayaxunkin mekexunxankananikiki."
- ⁶ Jabun matu kenakinan: "Jabu Jehován tsumabudan,
jawenabu Diosbe janchaxunikabuki", matu waxankananikiki.
Nawabu chaikexun jatun jamapai ibubis matu bexuanbu
man jawen benimai shinan chankanxanaii,
jatun tadi jawendua inun jatun dauti pepa sawea mapuadan.
- ⁷ Man enabu jabu matuki sinatakin ichakawakin matu
dakewakubainibu
nuitapakin bika midima man mekubainima keska
natian ja binumakin matun mae anuxun
mabu kadu midima inun benimai shinan chankain jenetima bi
man jawen jiwekunkainxanaii.
- ⁸ Diosun jatu yuikin:
"Yunuti kushipa pepa ea Jehován en bechipaimiski.
Jakia jabu yumetsumisbu inun yuda betsa tenamisbu
danain en jatuki sinatamiski.
En shinan jaskawen taea enabu jabu duawakin jeneama
pewen jatu manakukatsi iki en jatube yubakakin
mestenwankin en akibi axanaii.

- ⁹ Matun bababu pakubaini pe jiweabun
nawa xukua tibibun jatukidi pe shinankin
kenwankin yuikubainxankanikiki.
Jehován jawenabu pewen jatu duawakubainai
dasibibun jatu uinkin unanxankanikiki”, ikaya
- ¹⁰ Jaskakidi Jehová yubakakunkainaiwen taea
ea en shinan chankaiin.
Jawen meketi jaya ea inankin piskumatan
jawen yunuti kushipawen ea mekekin binumakin ea
duawakubainikiki,
juni ainyankatsi iki jawenduakin maiti pepa sawemis keskai inun
ainbu beneyanun, iwanan, jawenduakin
dauti betsa betsapawen daumis keskaidan.
Jaskawen taea en Dioswen en benima chakayamaii.
- ¹¹ Jaska miban mai anua jukuin pexei taemis keska inun
bai watan jawada jexe betsa banashinabu
pexetan jukuin ewamiski.
Jaska keskadi wakin Jehován jawen kushipawen
jawanabu jatu binumakin
dasibi nawa xukuabu jatu kantamakin kenwanmaxanikiki.

Jaki sinataibu Diosun jatu kupinikiaki, na janchadan

63 ¹ Isaíasin Dios yukakin:
—Ja jawen tadi tashipaki pukuima keska
tadi jawenduajaida sawea
bai tanabidani kushichakayamakidani
Edomnen mae ewapa Bosrá anua juaidan,
¿tsua jui ikimenkain?— en aka

Diosun ea kemakin:
—Jabia ea Israelin Dios en jui kaii,
matuki sinamatamisbu matu maemaxuntan
en kushipawen en matu piskumashina matuki chani juidan— aka

² Isaíasin ana yukakin:
—¿Jaskai min tadi tashipamen,
min taewen uva bimi min pema pema aka keskadan?— aka

³ Diosun kemakin:
—Chanima ean besti uva en pemashina ikaii,

tsuan ea dabewamadan.

Sinata pae paekain eki sinataibu en jatu pema pema aka
jatun jimi eki sa sa ikin en tadi cha akin jimin ea idumawashinaki.

⁴ Eanan, en yunuti kushipawen enabu Israel en medabewaxanai
ja xabatian en ati wani ma janu ikaya
enabu en jatu ana mebikinanxanaii.

⁵ En jatu uinbauna janu tsuan ea medabewatidumaken
ea e itan ana: “Tsuainda ea medabewawa”, ibiatan
en mekenen en jatu dete keyushinaki.

En sinatajaidaiwen taea en kushipawen
en jatu maemashinaki.

⁶ Nawa xukuabuki sinatakain jatuki di ikin
en jatu yamawashinaki,
jatun jimi maiki jatu jabamabainkinan— ikaya

Diosun Israelbu jawen duapa jatu unanmanikiaki, na janchadan

⁷ januxun Isaásin yuikin:

“Ea janchaidan, Dios nukipakidi en janchakatsis ikaii.

Dasibi jatun nuku axunmis inun,
Israelin enabu jawen duapa keyutimawen nuku duawamis inun,
nukuwen nuikin nuku bechipaimiswen taea
ja kenwain en kantakatsis ikaii.

⁸ Diosun yuikinan: ‘Ja enabu en bakebunan,
jawa ea danankin ea chakabuwama ixankanikiki’, itan
jatun jabu piskumaikiki,

⁹ bika betsá betsá mekin teneaibudan.

Jabu jau jatu janchaxununbun Diosun yunuismadan,
jabudan, jatu piskumamaki,
ibubis Jehová Diosun jatu wakinan.

Jehová nukuwen dabanan ikin nukuwen nuikinan,
nuku mebikinanmiski,
nuku mekexun nuku ikuai keska wakinan.

Jaska nuku axunkubainmis keska wakin nuku axunkin jeneama ikunkainiki.

¹⁰ Jatu jaska wabia Israelbun Jehován Yushin sinatamakin dananibuki,
nukun mekenika medibi ichakinan.

Jaskawen taea ja danainbuki sinatakin
jau jatu detenunbun nawabuwen jatube detenamekunkainiki.

¹¹ En jatu jaska wakubidana Israelbun jatun xenipabu Moisin jatu
medabewakin

Egipto anua taxnimani jabun shinain jatumebi yuka ikin:

‘Ja Moisés jawen chaxuwan mekenika wakatsi jenewan Nilo anua
nexenidan, ¿janimen, ja Diosdan?

Jatun jawen Yushin medibi kushipa Moisés inanidan, ¿janimen?

¹² Jatun jawen kushipa pejaidawen Moisés mekekubainidan, ¿janimen?

Jawen taea jawen kena pepa jakimatinawakin

Ianenwan Tashipa nukunabu paxkaxunidan, ¿janimen?

¹³ Jatun Ianenwan nuajaidabiaken jawa jatu daxkibain tin imama

pukemakin

caballo mai metu anu kushikainmis keska jatu wanidan, ¿janimen?"
ikaibun

¹⁴ jabu mekesuxun iyukubainkinan,

ina awa napanpa anu butumis keska wakin

Jehován jawen Yushin kushipawen jatu nimakubainiki.

Jaska wakin jawenabu mekesuxun jatu iyukubainkin

jawen kena pepa kushipa dasibibu unanmaniki", iwanan,

Isaásin Diosbe jawenabu jatu janchaxuniaki, na janchadan

¹⁵ "Jehováan, janu min ika naiudi min mae medibi pepa anu
jadi jiwexunan, nukukidi shinanwen.

¿Jania? min nuikipa pepajaida inun min kushipadan.

¿Jania? min jawen nuku shinamisdan.

Min nukuwen dabanan imisdan, ¿min ma nuku jatsanmen?

¹⁶ ¡Miadan, min nukun epaki!

Nukun xenipabu Abrahamnen ana nuku shinanma ma nuku
jakimabiaya

nun Israelbubia jaskatan nukunabube nun ana jatuki dasi
unantinantimaki.

Nun jaskabiaya Jehováan, miadan, jibia min nukun epaki.

Nuku mebikinain taenixun nuku jeneama min nuku akubainaii.

¹⁷ Jehováan, ¿jaskakin min jancha nun chibanbiaya

min kati bai min nuku benumamismen?

¿Jaskakin miki meseti shinanmama

nukun juinti min nuku kushi wamismen?

Min nuikipawen taexun min tsumabu

jawaida jatukidi shinan betsa watan jatu pewadiwe,

minabu xukuabu tibi wakin min jatu katunidan.

¹⁸ Minabu medibi min jatu katuni ja mae anu jiwea

jatixunda jatunawai jiweama ikimabuki.

Nukuki sinataibun min Templo ichakawakin

mia pema pema akainmabuki,

¹⁹ min nukun xanen ibumaken nuku akawakin inun

min kena kushipa nun jayama nuku wakinan.

64 ¹En shinanan, nai baxnebidan min bututiduki,
min kushipawen mati matipa saki saki imabidankin inun

² chi jedewen ni maxu menuai keska inun
unpax pichan kukatsa ikai keska wakinan.
Min jaska waya miki sinatamisbun
min kena kushipa taxniai uinkin unain
nawa xukua tibibu mia bebunua bene bene ixankanikiki.

³ Jamapai atimapa min kainmaya
bebunkidi nun jawa unankin manamaken
min butuaya mati matipa mia bebunua saki saki ixanikiki.

⁴ Nun miki chiti ikaibu min nuku medabewamis keska
tsua mia keska yushin betsa binua jayama
nun ninkaisma inun nun uinsmaki.

Mia besti min Dios kayabi kushipatun dasibibu binuaki.

⁵ Tsuada benimakin jaska min bechipaiai keska akaibu
min jawa jatu dananma ninkatan medabewamiski.

Min jaska bechipaiai keska jakimama mia axununbun
min jaska jatukidi shinankubainmiski.

Ja dukun nun mia chakabuwakin taewani badi ichapatian
ja chakabuwen taea ja shinain min nukuki sinatakunkainaii.

⁶ Dasibi nukubudan, nun chakabuki,
juni jamapai chakabu iduma keskabu
Dioski nun kematidubumadan.

Dasibi nun medabenamis tibi nukun aka pepadan,
tadi chakabu nun detsis keskabuki.

Dasibi nukubunan, kanei nun ma di iki keyuabuki,
ni pei xanai nidi imis keskaidan.

Sinatakin nun yudabu chakabuwamisdan,
ja chakabunan, niwen nuku buawamiski, xadabainkinan.

⁷ Tsuan mia shinain mibe janchai ana tsua jayabumaki.
Jau min jatu medabewanun jawen bika tenekin
min kushipa benakin mia yukabumaki.

Nukun chakabuwen taea nuku jenei nukuki pechitan
ana nuku medabewai janchama min juneaki.

⁸ Nun jaskabiakenan, Jehováan, min nukun epaki.
Nukudan, nun mapu keskaki.

Jamen miadan, min mapu dami wanika keskaki.
Nuku dasibidan, jabia mian min nuku dami waniki.

⁹ Jehováan, ana nukuki sinata chakayamama inun
jawenchains ana nukun chakabu tibi shinanyamakubainwen.
Uinwen. ¡Nukubudan, nun minabuki!

¹⁰ Min maewan medibi tibi ana pema ma janu tsua ana jiweabumaki.

Jerusalén maedan, ma chakabuwakin di anibu maniaki.

- ¹¹ Mia januxun kenwanti jiwe jawenduajaida anuxun
nukun xenipabun mia kenwanpaunibudan,
ma chiwen menukin keyunibuki.
Dasibi nun bechipaikubainidan, ma di anibu mishki besti maniaki.
- ¹² Na jati chakabuwen taeadan, Jehováan,
¿min ana jakidi jawa wati shinanmamen?
¿Ana jakidi janchama pesxun
min ana nuku dakewakin jeneama ikunkainxanai?” aka

Yushin betsá kenwanmisbu Jehován jatu chitenikiaki, na janchadan

65

- ¹ Jehován kemakin yuikin:
“Jabu ebe janchakin ea jawa yukaismabia
jabu eki nukunibuki.
Jabun ea benaismabia
jabun ea bechinibuki.
Nawa xukua betsabun ea jawa ea akabumabiaken
kaintan ean jatu yuikin:
‘En nenuki. En matu ninkaii’,
en jatu aniki.
- ² Ja enabu sinatapabun ea ninkabumabiaken
jawenchains ea anu jatu chintunwanun ixun
en jatu meshanxunbia
jawa ea ninkama jaska jatun bai chakabu besti tanakin
jatun shinanan besti jaska bechipaiai aki jawen kenmisbuki.
- ³ Ja Israel enabunan, xabakabi eabi
eki sinatakin ea danaín jeneisbumaki.
Jatun bai nemakixun yushin betsabu besti kenwanun ixun
jatun inabu menuxunmisbuki.
Mai bawa chi tapu watan jakixun jatun ininti kuaxunmisbuki.
- ⁴ Ja enabunan, maxax tanpe medan
yudabu mai wamisbu anu meshu medan bua
jadi tsauxun mawabun yushin kenwakin jatu shinanmisbuki.
Ja dikabi ina yawa nami jau piyamanunbun
en jatu nemabiani jawa eki dateama pimisbuki.
Yushibu jatu nami inantan januxun jatun kentiki jawen jene
juxketan
ja nami jene atimapá akubainmisbuki.
- ⁵ Na enabu pepamabia mapubaunkin jatu yuikin:
‘Eadan, en medibijaida Diosunaki.
Nedi eki kematan ea mekin metsayamakanwen’

ibiaidan, ja junibudan, chi ketianbu badi chaitanai ji ikin
jawen kuinwen ea dechexanwanmis keskabuki”, itan.

Nai inun mai Jehován ana bena wanunbadikiaki, na janchadan

¹⁷ “Man ea jaska wabiaibun en matu axunxanai ninkakanwen.

Nai inun mai en ana bena waxanaii.

Jabu dukun dasibi en jatu dami wani jakimaxankanikiki,
tsuan ana jabukidi shinanmadan.

¹⁸ Jabu dami wakin en ana bena waxanaiwen taea
benimai shinan chankankubainkanwen.

Ja Jerusalén ana bena wakin benima paketi besti
en matu waxunxanaii.

Ja mae anu yudabu jawen jiweaibudan,
ana jawa bika teneama benima besti jiwexankanikiki.

¹⁹ Jerusalén ibubis en bena washinawen taea en benimajaidaxanaii,
janu enabu shinan chankain ea jiwexunxanaibudan.

Ja mae medanuadán, ana jawa kaxai inun bibiski iki bika teneaibu
ana tsuan jatu ninkama ixanikiki.

²⁰ Ja mae anudan, bakeishta kain bena
xaba eskadabes ana mawama ixankanikiki.

Ja inun, juni ewabu jatun jiwea chaipa keyudiama mawama
idiaxankanikiki.

Ma 100 añobia jabu mawaidan,
bedunan keskas mawaxankanikiki.

Jamen tsuabuda 100 año kadiama mawaibudan,
yupuawen besti mawaxankanikiki.

²¹ Ja inun, betsadan, yuda betsan jiwe bena watan
ja medan jiwekunkainxanikiki.

Januxun uva bai waxun banatan
januxun jawen bimi pikubainxanikiki.

²² Ja inun, betsadan, juni betsan jamen jiwe wama jawen jiweken
yuda betsan mebianma ixanikiki.

Ja inun, tsuada betsan bai wakin banaken
juni betsan madiastun ana pianma ixanikiki.

Enabudan, jatun jiwea chaipakubainxankanikiki,
ji kushipa mawaisma keskaidan.

En jatu katunidan, jatun mekenen dayaxun pi benimaxankanikiki.

²³ Ana jamenmens besti dayama ixankanikiki.

Jatun bakebu mestebudiamá inun yuxabudiamá
ana mawama ixankanikiki.

Jatun ibubu inun, jatun bakebu inun, jatun bababu inun,

dasibi jatunabu pakubainaibu jabiaskasdi jiwepakexankanikiki,
ean en jatu duawakubainaiwen taeadan.

²⁴ Jabun ea kenakin ea ea adiabuma
ean dukun jatu kemakin:
‘¿Jawamen?’ en jatu wakubainxanaii.
Ebe janchakin jawadakidi ea yuka keyudiabuma
en jawaida jatu ninka keyukubainxanaii.

²⁵ Kaman inu lobo pubenbia chaxuwan bakebe ketaxamexun
jawama pixanikiki.
Inu betsa león ana pubeanma ina awa bene keskakin basi pixanikiki.
Dunu pianantun pitidan, mai kudu besti ixanikiki.
Dasibi en mati medibi pepa anu mapuabudan,
ana jawa bika tenei chakabuama dasibi pe besti ixankanikiki”,
ikin Jehován jawen jancha yuikin mesterwaniki.

66 ¹Januxun Jehován ana jatu yuikin:
“Nai anudan, janu xanen ibui en tsauiski.

Jamen maikidan, en tae en janu kenyamiski.
¿Ea janu juindukunmanun ixun jani tsuan ea duawakin
xaba betsa anu ea jiwe waxuntidumen? Tsuan atidumaki.

² Dasibi betsa betsapadan, ean besti dami wakin en keyuniki.
Jaska wakin en taewa jayai jiwenibuki.
Ean junibu uinkin medabewakinan,
jabu keinsbuma inun jatun chakabu jenetan
en janchaki mesekin ninkamisbu
en jatu amiski, ikin
ea Jehován en jancha en mesterwaiin”, iniki.
